



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

Գ. ՋԱՅԵԴՆԱՅԵ

41

ՔՐԻԿ ՊԱՐՈՅՐԻ
ԱՐԿԱԾՆԵՐԸ



715
49

Բագրատ Հայր
Հոփսիմ'եան Պարոյ
Կրտսէակ (Վրաստան)

45

6530 MAY 2011

ՆՈՒԷՐ ՄԱՆՈՒԿՆԵՐԻՆ

Handwritten signature

70
PH
38244

891.715

Ա. Դ. Ջաջեպիւնյան.

9-41

ՓՈՔՐԻԿ ՊԱՐՈՅՐԻ ԱՐԿԱԾՆԵՐԸ



Թարգմ. ուսանողից



Թ Ի Ֆ Լ Ի Ս

Արագատիպ ՄՆ. Մարտիրոսեանցի

1904 1904

2 APR 2013

3271

- 1.14245




Ա

ՊԱՐՈՅՐԻ ԱՌԱՒՈՏԸ

Պարոյր Հայկազեանը մի բարի, լաւ երեխայ էր։ Միայն նրա մի պակասութիւնը շատ էր գայրացնում ծնողներին. Պարոյրը սաստիկ կամակոր էր և սիրում էր միշտ իւր ասածն անել։ Առաւօտներն երբ դայեակը գալիս էր նրան հագցնելու՝ միշտ միենոյն պատմութիւնն էր սկսում. «Թո՛ղ ինձ, նազլու, գնա՛, ես ուզում եմ քնել, հեռացիր». ասում էր Պարոյրը վերմակը գլխին քաշելով և աչքերը ծածկելով քնած ձեանում։ Ահա այսպէս էր անում նա համարեա ամեն օր, մինչև որ հայրիկը կամ մայրիկը գային և ստիպէին վեր կենալ։

Հայրիկը շատ էր բարկանում, պատժում էր նրան — թողնելով երբեմն առանց մրգի, երբեմն առանց զրօսանքի։ Մայրիկը ամեն կերպ աշխատում էր փոքրիկ կամակորին խելքի բերել, բայց նա դարձեալ նոյնն էր անում։ Մի անգամ դայեակը սովորականից վազ մտաւ ննջարան, զարթեցրեց սանիկին և աւաց։

Дазволено Цензурою Тифлисъ 9-го Сентября 1903 г.



3532-84

—Պարոյր, ջանիկս, վեր կաց շուտ. հայրիկդ հրամայեց, որ ինքդ հագնուես: Վաղը քո ծննդեան տարեդարձն է. դու արդէն եօթը տարեկան ես լինում և հայրիկն ասում է, որ այդպիսի մեծ տղային հագնելն ամօթ է, թող ինքն իւր համար ամեն բան անի: Վեր կաց հոգիս, ես ժամանակ չունեմ, իսկ եթէ շուտ չհագնուես՝ հայրիկն էլի կըբարկանայ մեզ վրայ:

—Անհոգ եղիր, նազլու, ոչինչ չի լինի. ես այս րոպէիս. կուզես ցոյց տամ, ինչպէս շուտ կարող եմ վեր կենալ..... մէկ, երկու, երեք.... ահա ես ոտի վրայ եմ. գուլպաներս տո՛ւր:

—Ապրես, Պարոյր ջան. ահա գուլպաներդ և կօշիկներդ: Բոլոր շորերդ այստեղ աթոռի վրայ են. լուացուելու ջուրն էլ գոլ է. չմոռանաս սանրուել. աղօթքդ ասան և ապա կաթը խմիր. այստեղ բուլկի էլ կայ պարսիմատ էլ: Ես կերթամ, ժամանակ չունեմ.

—Լաւ, գնում ես գնան. ինչ լինի լինի, այսօր խելօք կըլինեմ:

Գայեակը միքանի անգամ համբուրեց իւր սանիկին ու գնաց:

Պարոյրը մի գուլպան շտապով հագաւ, միւսն էլ ձեռքն առաւ ու պատուհանին մօտենալով սկսեց փողոցը մտիկ տալ:

—Օհօ. երեխայքը կուռում են, ասաց նա, այն էլ ո՞նց են կուռում..... Բայց գուլպաս մոռացայ. դէ մի հագնեմ պըծնեմ:

Պարոյրը հեռացաւ պատուհանից. բայց յանկարծ

փողոցից երաժշտութեան ձայն լսելով, նորից վազեց դէպի պատուհանը և երբ տեսաւ զինուորներին, որ երաժշտութիւնով անցնում էին փողոցով, իհարկէ ամեն բան էլ մոռացաւ: Հրաշալի ձիու վրայ նստած սպան **(օֆիցեր)** երբ տեսաւ տկո՛ր Պարոյրին՝ ծիծաղեց:

—Այ եթէ ես էլ սպայ լինէի, մտածեց Պարոյրը, և այսպէս ձի հեծնէի ու փետուրներով գլխարկն էլ գլխիս փողոցներով ման գայի, ինչ լաւ բան կըլինէր: Գլխարկը ես իսկոյն կըշինեմ թղթից:

Պարոյրը մի լրագիր վերցրեց, եռանկիւնի գըլխարկ շինեց և ապա փետուրի փոխանակ մի թուղթ կտրտելով նրա մէջ ցցեց. յետոյ աթոռը հայելու մօտ քաշեց, բարձրացաւ վրան, գլխարկը գլխին դրեց և սկսեց բեղերը ոլորել, որ իհարկէ դեռ չէր բուսել. Յանկարծ դուռը բացուեց և Պարոյրի հայրը ներս մտաւ:

—Պարոյր, այդտեղ ինչ ես շինում, հարցրեց նա:

—Ա՛խ, հայրիկ, ես իսկոյն.... ես միայն գլխարկն էի շափում գլխիս, որովհետեւ ես ուզում եմ սպայ դառնալ, իջնելով աթոռից պատասխանեց Պարոյրը:

—Քեզ նման ծոյլերը սպայ չեն կարող դառնալ: Գայեակը մի ժամ առաջ եկաւ և դու նրան խոստացար մի րոպէում հագնուել, իսկ մինչև այժմ դեռ մի գուլպայ ես հագիլ:

—Հայրիկ, ես իսկոյն միւսն էլ կըհագնեմ. զինուորները երաժշտութեամբ անցնում էին և ես նա-

յում էի պատուհանից: Յետոյ գիտես հայրիկ, ինչ չարածնի երեխաներ կան փողոցում:

— Լաւ, լաւ, այդ բոլորը դու ճաշի ժամանակ կը պատմես, դեռ հագնուիր: Ժամը 10-ին վարժուհիդ կը գայ, պէտք է պատրաստ լինես, որ նա ստիպուած չլինի սպասել, ասաց հայրիկը և դուրս եկաւ սենեակից:

Պարոյրը սկսեց շտապով հագնուել. բայց դեռ չվերջացրած՝ լսեց որ իրանց գանդը քաշեցին. վարժուհին եկաւ:

Պարոյրը մի կերպ գլուխը սանրեց, առանց հացի մի բաժակ կաթ խմեց ու մտաւ դասարան. այդ ժամանակ միայն յիշեց, որ դասերը չէ կրկնել:

Վարժուհին, օրիորդ Սաթենիկն այն է սկսել էր յանդիմանել Պարոյրին, երբ յանկարծ ներս մտաւ կնքահայրը, որ շատ սիրում էր և երես էր տալիս իւր սանիկին:

— Բարև ձեզ, օրիորդ Սաթենիկ. բարև Պարոյր, գործերդ ինչպէս են. եթէ դասերդ լաւ ես սովորել՝ պարզ և կըստանաս, ասաց կնքահայրը: ➤

— Ո՛չ, կնքահայր, այսօր Պարոյրը արժանի չէ ոչ մի պարգևի, ասաց վարժուհին. բացի այն որ դասարան ուշ մտաւ, դասերն էլ բոլորովին չէ պատրաստել:

Պարոյրը կարմրեց և գլուխը կախ գցեց, որովհետև զգում էր իւր մեղքը:

— Ափսոս, շատ ափսոս, գլուխը շարժելով առայ կնքահայրը. ես զրա ծննդեան տարեդարձի առիթով,

վաղն ինձ մօտ մանկական տօն պէտք է սարքեմ, և շատ ցաւալի կըլինի, եթէ Պարոյրին չթողնեն մեզ մօտ գալ:

— Պարոյր, ասաց օրիորդ Սաթենիկը, գուցէ դու կաշխատես վաղուան դասերդ առանց սխալի պատրաստել:

— Իհարկէ, օրիորդ, լաւ կը պատրաստէ, ասաց բարի կնքահայրը: Յոյս ունեմ, որ դուք էլ կը գաք մեզ մօտ, օրիորդ Սաթենիկ, և անպատճառ ճաշի: Մենք առաջ կը գնանք նաւակով զբօսնելու, յետոյ խմբով անտառը կերթանք, իսկ երեկոյեան հրախաղ կըլինի:

— Ա՛խ, կնքահայր, այդ ինչ ուրախութիւն կըլինի, ինչ լաւ կըլինի, բացազանչեց Պարոյրը և կնքահօր վիզը փաթաթուեց, բայց յանկարծ թանաքամանին դիպչելով, շուռ տուեց և ամբողջ սեղանը թանաքոտեց:

— Ո՛հ, Պարոյր, դարձեալ անկարգութիւն, ինչ անշնորհն ես, ծիծաղելով ասաց կնքահայրը և դուրս գնաց դասարանից:

Պարոյրը զրպանից թաշկինակը հանեց՝ կամենալով թափած թանաքը սրբել. բայց օրիորդ Սաթենիկը շտապով բռնեց նրա ձեռքը և կանչեց աղախնին, որ սեղանը սրբէ: Սակայն տետրակներէ ու զրքերէ վրայ թանաքի հետքերը մնացին, որ Պարոյրի անշնորհութիւնն էին յիշեցնում:



Բ

ՊԱՐՈՅՐԻ ԾՆՆԴԵԱՆ ՕՐԸ

Նախաճաշից յետոյ երբ Պարոյրը պատրաստուում էր զբօսանքի գնալ՝ ասաց.

—Մայրիկ, քեզանից մի բան եմ խնդրելու և յոյս ունեմ չես մերժի:

—Ասա՛, ինչ ես ուզում, սիրելիս. տեսնեմ ուզածդ մի խելօք բան է թէ ոչ:

—Իհարկէ, մայրիկ ջան, մինչև անգամ շատ խելօք բան է. վաղը, իմ ծննդեան տարեդարձի օրը ինձ մի փողպատ ընծայիր:

—Լաւ:

—Միայն թէ, մայրիկ ջան, թող ես ինքս ընտրեմ, որովհետև դու չգիտես թէ ես ինչ տեսակն եմ սիրում:

—Չատ լաւ. գնա հագնուիր և իսկոյն գնանք առնենք:

—Չնորհակալ եմ, մայրիկ ջան, ասաց Պարոյրը և ուրախ-ուրախ վազեց դայեակին յայտնելու. խանութում Պարոյրը նայեց բոլոր փողպատները.

լայց չէր կարողանում ընտրութիւն անել—մէկը շատ մուգ էր թւում, միւսը բաց: Նա ուզում էր մօրը խնդրել, որ գնան մի ուրիշ խանութ, բայց մայրը մի հոնի գոյն փողպատ ընտրելով ասաց.

—Ահա, Պարոյր, մի հրաշալի փողպատ. ես խորհուրդ եմ տալիս այս վերցնել:

—Չատ լաւ, մայրիկ, գնիր այդ և շուտով տուն գնանք:

—Ինչո՞ւ այդպէս շտապում ես, դեռ մի քիչ գրօսնենք:

—Ո՛չ, մայրիկ, ես ուզում եմ, որ դրա ծայրին դու մի ծաղիկ կարես. ծաղիկով շատ գեղեցիկ է, ես հաւանում եմ: Վաղը, երբ կնքահօր մօտ գնալու լինենք՝ ես այդ փողպատը կրկապեմ:

Մայրիկը ծիծաղեց և խոստացաւ կարել:

Յաջորդ առաւօտը կարած սիրուն փողպատը մահճակալի գլխին կախած էր:

Եկաւ դայեակը Պարոյրին դարձեցնելու և հետը նշով ու քիշմիշով գարդարած մի մեծ կարկանդակ բերեց: Հեղինէ քոյրիկը մի գոյգ թենոցի ճարմանդներ (գապոնկէք) ընծայեց եղբօրը. հայրիկը մի մեծ սիրուն պատկերազարդ գիրք, իսկ մայրիկը մի հրաշալի շոգեկառք, որը բանալիով լարելուց յետոյ այնպէս էր սլանում, որ կարծես իսկական շոգեկառք լինէր:

Պարոյրը բոլորովին հիացել էր. նա այս անգամ զարմանալի շուտ հագնուեց և մինչև վարժուհու գալը բոլորովին պատրաստ էր:

— Բարե քեզ, Պարոյր, շնորհաւորում եմ ծըննդեանդ տարեդարձը, ասաց վարժուհին: Ինչպէս տեսնում եմ՝ դու վաղուց ես պատրաստուել, շատ լաւ ես արել: Յոյս ունեմ այսուհետեւ խելօք կըլինես. այժմ դու արդէն մեծ ես: Գասդ գիտես արդեօք:

— Գիտէք, օրիորդ Սաթենիկ, երէկ ես բոլորովին ժամանակ չունէի— մօրս հետ գնացել էի փողոց. այսօր նոյնպէս ժամանակ չունեցայ դասերս կրկնելու. որովհետեւ իմ ընծաներն էի հաւաքտեղակ անում. բայց գուցէ առանց պատրաստելու էլ գիտեմ:

— Ես քո այդ գուցէին այնքան էլ չեմ հաւատում, գիւրբդ բեր և աստ տեսնեմ ինչ ես սովորել:

— Կապիկն ու ակնոցը:

— Դէ լաւ, սկսիք:

— Կապիկն ու ակնոցը..... կրկնեց Պարոյրը հագալով:

— Յետոյ, ասաց վարժուհին ժպտալով.

— Կապիկը երբ թուլացաւ, նրա աչքերը ծերացան:

— Ո՛չ, այդպէս չէ. աստ «կապիկը երբ ծերացաւ, նրա աչքերը թուլացան»:

— Դէ այդ միևնոյնն է, օրիորդ Սաթենիկ, ասաց Պարոյրը:

— Բոլորովին միևնոյնը չէ. այնպէս պէտք է ասել, ինչպէս գրքումն է գրած:

— Կապիկն ու ակնոցը..... Օրիորդ Սաթենիկ, այսօր մայրիկս ինձ մի լարուող շոգեկաւք ընծայեց:

— Լաւ, լաւ, ասաց օրիորդը, այդ բոլորը յետոյ, դեռ դասդ պատասխանիր:

— Կապիկն ու ակնոցը: Կապիկը երբ թուլացաւ, կապիկը երբ ծերացաւ..... թուլացաւ:

— Այդպէս չէ, Պարոյր:

— Դէ լաւ, այժմ լաւ ասեմ. կապիկը երբ ծերացաւ, նրա աչքերը թուլացան. մարդկանցից նա լսել էր..... Օրիորդ Սաթենիկ, ոտերը շարժելով հարցրեց Պարոյրը, մի՞թէ կապիկները մարդոց ասածը կարող են հասկանալ: Գիտէք, օրիորդ, հայրիկն ինձ մի գիւրք ընծայեց, այնտեղ գանազան կապիկներ կան նկարած, ուզում էք ցոյց տամ:

— Պարոյր, ես տեսնում եմ, որ դու դասդ բոլորովին չես սովորել, ասաց օրիորդ Սաթենիկը. տես որ հետեւեալ դասի համար շատ լաւ իմանաս. ահա չորս տող էլի աւելացնում եմ: Սկսենք թուաբանութեան դասը: Երկու անգամ ութը քանի կանէ:

— Կարծեմ տասն և հինգ, ասաց Պարոյրը:

— Տասն և վեց, ասաց օրիորդ Սաթենիկը: Երկու անգամ երկու:

— Այդ արդէն ես գիտեմ՝ չորս է: Օրիորդ Սաթենիկ, վեց-վեց ինչ կըլինի:

— Տասն և երկու:

— Ա՛յ չիմացաք, ուրախ-ուրախ բացագանչեց Պարոյրը, ոչ թէ տասն և երկու կըլինի, այլ փորը քաղցած կըլինի. որովհետեւ ով որ քաղցած է, ասում է «փորս վեց-վեց է անում»:

— Կատակների ժամանակ չէ, Պարոյր, խիստ

ձայնով նկատեց վարժուհին. ինչպէս տեսնում եմ՝ աղիւսակն էլ չես կրկնել, և ես շատ պիտի ցաւեմ, եթէ քո ծննդեան տօնին ստիպուած լինեմ քեզ պատժել:

— Իէ, ես ինչ անեմ, ասաց Պարոյրը շրթունքներն ուռցնելով:

— Ի՞նչպէս թէ ինչ անես. մի՛թէ քեզ համար ամօթ չէ այդ:

— Ի՞նչ էք զահլա տանում. դուք սաստիկ ցանկանում էք ինձ պատժել. բայց ոչ, այսօր ինձ չեն պատժի: Այսօր մինչև անգամ ես բոլորովին չպէտք է պարապէի, իսկ դուք դեռ ուզում էք ինձ պատժել:

— Պարոյր, այդ ինչպէս ես խօսում, լռիր, բաւական է. ցաւում եմ քեզ վրայ, եթէ ոչ կերթայի հայրիկիդ կրգանգատուէի:

— Իուք չար էք, այդ էլ կանէք:

Հայրիկը կողքի սենեակից լսելով Պարոյրի պատասխանները՝ յանկարծ ներս մտաւ:

— Այդ ինչ եմ լսում, այդ ինչ յանդուզն խօսքեր ես ասում: Իսկոյն ներողութիւն խնդրիր օրիորդ Սաթենիկից:

Պարոյրն անշարժ կանգնած էր: Հայրիկը նորից կրկնեց իւր պահանջը: Պարոյրը դարձեալ լուռ էր:

— Պարոյր, վերջին անգամ եմ ասում, գնա՛ վարժուհուց ներողութիւն խնդրիր. իսկ եթէ պատուէրս չկատարես, ես քեզ խիստ կը պատժեմ:

Պարոյրը երեսը ձեռներով ծածկեց և շարունակեց լուռ մնալ:

— Որ այդպէս է, դու կնքահօր մօտ չես գնայ, ասաց հայրիկը:

Պարոյրը սկսեց լաց լինել: Օրիորդ Սաթենիկը գրկեց նրան և ասաց.

— Պարոյր, դէ, ասա՛ ներողութիւն օրիորդ և բոլորը կը վերջանայ, մի՛թէ դժուար է այդ, դէ միայն մի խօսք ասա՛ ներողութիւն:

Բայց փոքրիկ կամակորը շտեց ու սկսեց աւելի խիստ լալ:

— Թողէք դրան, օրիորդ Սաթենիկ, ասաց հայրիկը. թող այնքան մենակ նստի այստեղ, մինչև որ խելքի գայ և ներողութիւն խնդրէ ձեզանից: Եւ հայրիկն ու վարժուհին միասին դուրս եկան դասարանից:

X





Գ

ՊՄՐՈՅՐԻ ԿԱՄԱԿՈՐՈՒԹԻՒՆԸ

Կէս ժամի չափ Պարոյրը սեղանի առաջ նստած՝ նայում էր գրքերին ու տետրակներին և գլուխը կախած խզգրգում էր: Յանկարծ դուռը բացուեց և ոտների մատների վրայ քայլելով ներս մտաւ Պարոյրի տասը տարեկան քոյր Հեղինէն, որ մի սիրուն սեւաչեայ աղջիկ էր:

— Պարոյր, սիրելիս, կամացուկ ասաց քոյրը, փաթաթով տուելով եղբորը. հայրիկից ներողութիւն խնդրիր, օրիորդ Սաթենիկը գնաց: Հայրիկն ու մայրիկը շատ տխուր են. ես էլ առանց քեզ կնքահօր մօտ չեմ գնայ:

— Իսկ դու կարծում ես ինձ շատ դուրեկան է տանը նստել: Այս բոլորը վարժուհու մեղն է:

— Սխալում ես, Պարոյր, օրիորդը ինքն էլ շատ ցաւում էր վրադ. նա մինչև անգամ հայրիկին խնդրում էր քեզ ներել: Դու դասդ բոլորովին չես գիտեցել, բայց նա էլի չէր ուզում քեզ պատժել: Հայրիկն ինքը լսել էր, թէ ինչպէս կոպտութեամբ դու նրան պատասխաններ ես եղել տալիս, ուստի դու

անպատճառ ներողութիւն պէտք է խնդրէիր օրիորդից:

— Այո, այո, ձեր կարծիքով ամեն բանում ես եմ մեղաւոր:

— Իհարկէ մեղաւորը դու ես, Պարոյր, և եթէ դու հայրիկից ներողութիւն խնդրես՝ նա քեզ իրաւունք կըտայ գնալ կնքահօր մօտ, ապա թէ ոչ ամբողջ օրը տանը կըմնաս:

— Ես ներողութիւն չեմ խնդրի, ես մեղաւոր չեմ:

— Ախ, Պարոյր, միթէ չես ամաչում. ապա քո կարծիքով ո՞վ է մեղաւոր. մի լաւ մտածիր— դասերդ չէիր սովորել, վարժուհուն կոպիտ պատասխաններ ես տուել, այժմ էլ կամակորուժիւն ես անում: Աւելի լաւ է, գնա՛ հայրիկի մօտ և ասա. «Ներիր, հայրիկ ջան»: Այն ժամանակ լաւ կըլինի, բոլորը կուրախանան և մենք միասին հրաւէրքին կըգնանք: Վեր կաց, Պարոյր ջան, գնանք միասին հայրիկի մօտ. ես ինքս կասեմ, որ ահա Պարոյրը եկել ներողութիւն է խընդրում քեզանից. դու էլ հայրիկին կըհամբուրես և ամեն ինչ կըվերջանայ: Ի՞նչ վեր կաց:

Պարոյրը տատանուելով վեր կացաւ աթոռից ու կամաց գնաց քրոջ յետեից: Բայց հէնց որ դուռը բացուեց և Պարոյրը հայրիկին տեսաւ՝ իսկոյն յետ փախաւ ու կանգնեց դասարանի անկիւնում:

— Հեղինէ, եկ նախաճաշելու, ասաց հայրը:

Հեղինէն նստեց նախաճաշելու, իսկ փոքրիկ կամակորը դարձեալ մենակ մնաց:

Միքանի ըոպէից դայեակը մտաւ Պարոյրի սե-

նեակը և մատուցարանով նրա համար նախաճաշիկ բերեց:

— Է՛հ Պարոյր, այս ինչ բան արիր քո ծննդեան օրը. փոխանակ ուրախանալու, այդպէս տխուր ես անց կացնում այս ազիզ օրը: Եկ նախաճաշդ կեր և յետոյ գնա՛ հայրիկիցդ ներողութիւն խնդրիր, ասա՛, «հայրիկ ջան, այլևս այդպէս բան չեմ անի, խնդրեմ ինձ էլ տանէք կնքահօր մօտ»: Իսկ ես նոր շորերդ կը պատրաստեմ. փայլուն կօշիկներդ կը բերեմ, կարովի փողպատդ էլ կը կապես: Դէ կեր, հոգիս, թէ չէ կսառի:

— Ի՛նչ անբախտ եմ ես, նազլու, ինձ ոչ ոք չի սիրում:

— Ախ, սիրելիս, ի՛նչ ես ասում, քեզ և Հեղինիկին հայրիկն ու մայրիկը աչքի լոյսի պէս են սիրում: Յանցանք ես գործել, դէ ներողութիւն խնդրիր, պըրժաւ գնաց: Հեղինիկը քո պատճառով լաց է լինում, իսկ հայրիկն ու մայրիկը սաստիկ տխուր են: Կամ ի՛նչպէս պէտք է դու տանը մենակ մնաս, երբ բոլոր երեխաները պէտք է գնան այնտեղ ուրախանալու: Ախար կը հարցնեն, թէ Պարոյրը ո՞ւր է, և կիմանան, որ Պարոյրը կամակորութեան պատճառով պատժուած է և տանն է մնացել:

— Այժմ արդէն ուշէ, հայրիկն այլևս ինձ չի ների, այդ ես գիտեմ. նա շատ գոհ կը լինի, որ ես տանը մենակ մնամ:

— Մեղաւորը դու ես Պարոյր. դու կամակոր ես: Աւելի լաւ է, սիրունիկս, գնա՛ հայրիկից ներողու-

թիւն խնդրիր, յետոյ եկ հագնուենք: Ես գնամ Հեղինիկին օգնեմ հագնուելու:

— Ասում եմ չեմ գնայ, կը կնեց Պարոյրը չարացած:

— Քո կամքն է, կուզես այդպէս տանը նստիլ: Դայեակը հեռացաւ ու մի կէս ժամից յետոյ Պարոյրը լսեց, որ ծնողներն ու Հեղինիկը պատրաստում են գնալու: Մայրիկը դուռը բացեց ու ասաց.

— Դէ Պարոյր, շուտ արա, եկ ներողութիւն խընդրիր, դեռ ուշ չէ, հայրիկը կը ներէ:

Պարոյրը գլուխը բացասաբար շարժեց: Նախանենեակի դուռը փակուեց և ամեն ինչ լռեց: Պարոյրը մօտեցաւ պատուհանին, տեսաւ հեռացող կառքը և սկսեց դառը հեկեկալ:

1009
1604





Դ

ՊԱՐՈՅՐԻ ԶԲՕՍԱՆՔԸ

Պարոյրը վերջապէս ձանձրացաւ լաց լինելուց, մօտեցաւ պատուհանին, սկսեց ապակիներէ վրայ մատներով ածել ու անց ու դարձ անողներին նայել: Յետոյ յիշելով իւր նոր խաղալիքներն՝ ընտրեց նրանց միջից շոգեկառքը և սկսեց խաղալ: Այս միջոցին դայեակը ներս մտաւ ու ասաց.

—Դու քո ասածին մնացիր, Պարոյր, հայրիկն էլ իւր ասածն արաւ: Հիմա լաւ եղաւ:

—Չատ պէտքս չէ. հէնց տանն էլ կըմնամ, ասաց կամակորը:

—Դէ ինչ եղաւ եղաւ, էլ բանը բանից անցել է: Բայց այդ շոգեկառքը իսկապէս հրաշալի բան է. կարծես իսկական լինի:

—Նազլու, կուզես պատկերներ ցոյց տամ:

—Պատկերները յետոյ ցոյց կըտաս, այժմ սիրելիս, դու ինքդ քեզ համար մենակ խաղան. ես պէտք է լուացարարի մօտ գնամ: Չուտով էլի այստեղ կըլինեմ. եթէ քեզ մի բան հարկաւոր լինի, խոհարարու-

հուն ասա: Ես քեզ համար շաքարահաց կըբերեմ. խելօք կաց սիրունիկս:

—Լաւ նազլու. բայց դու սերուցով շաքարահաց առ ինձ համար, գիտես այն սպիտակ ու վարդագոյն շաքարահացերը:

—Չատ լաւ, աչքիս լոյս, մէկը սպիտակ կըբերեմ, միւսը վարդագոյն:

Գայեակը դուրս եկաւ, շալը գլխին առաւ ու սանդուխքով իջաւ: Այդտեղ նա պատահեց դռնապանի կնոջը:

—Բարև քեզ, Մագլթաղ. երեսային վերևը մենակ թողի, տանը ոչոք չկայ, մի ըոպէ պէտք է լուացարարի մօտ գնամ:

—Ներս արի խնդրեմ, թէյը պատրաստ է, մի բաժակ խմիր:

—2է սիրելիս, ժամանակ չունեմ, վախենում եմ, Պարոյրս մենակ է, չլինի թէ մի փորձանք պատահի:

—Ինչո՞ւ են նրան մենակ թողել. երևի հիւր են գնացել:

—Վարժուհուն կոպիտ պատասխան էր տուել, դրա համար պատժել են: Ամենքն ամբողջ օրով կընքահօր տուն գնացին, իսկ Պարոյրին չտարան:

—Ինչ չարն է եղել, բայց վրան նայելիս մարդ կարծում է թէ Աստուծոյ զառն է:

—Դեռ փոքր է. լաւ երեսայ է, միայն մի քիչ կամակոր է. ամեն բանում իւր ասածն է անում: Ուղիղն ասած՝ հայրն էլ կամակոր մարդ է, ճիշտ որ կացինը քարին է դիպել:

—Այ թէ ինչ: Խաթայ են այս երեխաներն էլի-
քանի դեռ փոքր են՝ ծնողների համար հոգս ու չար-
չարանք են, մեծանում են՝ էլի նրանց հոգսից մարդ
չէ ազատում: Նազու, երբ վերադառնաս մի բուսի
մտիր, միասին թէյ խմենք. ամուսնուս տեղ ու-
ղարկեցին, իսկ ես մենակ չեմ սիրում թէյ խմել:

—Չնորհակալ եմ, Մագթաղ ջան, այսօր ժամա-
նակ չունեմ, դուռը բանալով ասաց նազունն ու հե-
ռացաւ:

Մի քիչ խաղալուց յետոյ՝ Պարոյրը սկսեց սե-
նեակներում թափառել: Ննջարանում նա անկողնի
վրայ նկատեց իւր նոր շորերը, փողպատը և փուն-
ջերով գեղեցիկ կօշիկները սիրուն դարսած: Պարոյրը
հետաքրքրուեց փորձել, թէ շորերն ինչպէս են սազում
իրան: Երբ բոլորը հագաւ ու գուգուեց, հայելիի առաջ
կանգնեց ու նայեց: «Ափսոս չէ, մտածեց նա, որ
այս սիրուն հագուստով ինձ ոչոք չտեսնի:» Եւ իս-
կոյն որոշեց մինչև դայեակի վերադարձը դնալ մի
քիչ դրօսներ:

Պարոյրը բոլորովին մոռացել էր, որ ինքը պա-
տժուած է: Նա գլխարկը ծածկեց, ձեռնափայտը
ձեռքն առաւ, նախասենեակից դուրս եկաւ և սան-
դուխքն իջաւ առանց ոչոքի պատահելու: Դռնապանը
բացակայ էր, իսկ նրա կինը երեւի զբաղուած էր.
այնպէս որ ոչոք չտեսաւ, թէ ինչպէս Պարոյրը փո-
ղոց դուրս եկաւ: Եղանակը հրաշալի էր: Պարոյրը
ցանկութիւն զգաց երկար դրօսներ ու այնպէս տուն
վերադառնալ, որ դայեակը արդէն եկած լինի:

Հազիւ էր Պարոյրը տանից մի քիչ հեռացել և
ահա պատահեց մի տիկնոջ, որ երկու փոքր
երեխայի հետ գնում էր: Պարոյրը ձեռնափայտը
ճոճելով նրանց յետևից գնաց, երեակայելով՝ թէ
ինքը մի մեծ մարդ է:

Այսպէս սա մինչև քաղաքային ծառաստանը
(պարկ) գնաց նրանց յետևից: Այստեղ տիկինը նստեց
մի նստարանի վրայ և սկսեց կարդալ, իսկ երեխա-
ները սկսեցին ձի-ձի խաղալ, Պարոյրին էլ հրաւիրե-
լով միանալ իրանց հետ:

Պարոյրը ամեն բան մոռացաւ և ձիու նման
խրրխնջալով սկսեց ուրախ-ուրախ վազվզել:

Երկար ժամանակ երեխաները գուարճանում էին:

Սկսեց ցրտել: Տիկինը վեր կացաւ, երեխաներին
կանչեց, որ տուն գնան. իսկ Պարոյրը երկար վազ-
վրզելուց յոգնած և քրտնած նստեց նստարանի վրայ:
Նա զգաց որ քաղցած է, մանաւանդ որ ճաշի ժա-
մանակը վաղուց անցել էր, իսկ նախաճաշ էլ նա կար-
գին չէր կերել: Չեռքը տարաւ գրպանը և տեսաւ,
որ փողի քսակն այնտեղ է: Պարոյրը մի գրուանքայ
կեռաս գնեց, նստեց և մեծ ախորժակով սկսեց ու-
տել: Այդ ժամանակ նա նկատեց մի 13 տարեկան
տղայ ցընցոտիներով, որ կանգնած անդադար իրան
էր նայում: Պարոյրը բարի երեխայ էր. նա մտածեց
որ այդ տղան էլ ուզում է կեռաս ուտել:

— Կեռաս ուզում ես, հարցրեց Պարոյրը:

— Սաստիկ քաղցած եմ, բայց փող չունեմ, պա-
տասխանեց տղան:

—Սպասիր, ես քեզ համար իսկոյն կառնեմ. բայց զիտես, ես էլ քաղցած եմ. լաւ կըլինի, եթէ կեռասը հացով ուտենք: Ահա քեզ 10-ը կոպէկ, գնա երկու բուլկի առ, այստեղ էլ մէկ գրուանքայ կեռաս ունենք, լաւ կուտենք, կըկշտանանք:

Տղան փողը վերցրեց և մի ակնթարթում վազեց 2 բուլկի բերեց. կողք կողքի նստեցին և մեծ ախորժակով սկսեցին ուտել:

—Ի՞նչ համով է, չէ. ես կըրցանկանայի ամեն օր այսպէս ճաշել, ասաց Պարոյրը: Իսկ դու հաւանում ես:

—Իհարկէ հաւանում եմ, ահա 2 օր է՝ ոչինչ չէի կերել: Ընորհակալ եմ քեզանից պուճուր աղայ, փորս կշտացաւ, թէ չէ անօթութիւնից հոգիս դուրս էր գալիս:

—Ահա քեզ մի արասի էլ տամ. աւելի կըտայի, բայց ինքս էլ շատ չունեմ, մի մանէթանոց է մնում: Անունդ ի՞նչ է:

—Ստեփան:

—Իսկ իմ անունը Պարոյր է: Այժմ արդէն տուն գնալու ժամանակ է: Մնաս բարեաւ Ստեփան:



Ե

ՊԱՐՈՅՐԸ ՃԱՆՏՊԱՐԶԸ ԿՈՐՅՆՈՒՄ Է

Պարոյրը ձեռնափայտը ձեռքին առաջ գնաց, բայց երբ յետ նայեց՝ նկատեց որ այլևս ճանապարհը չէ յիշում, մինչև անգամ չգիտէ որ կողմը գնայ: Մանրավաճառներն ու կեռաս ծախսողն արդէն գնացել էին և այլևս ոչոք չկար: Արդէն մուլթն ընկել էր և ոչ մի տեղ լապտեր չէր երևում: Պարոյրը սարսափեց և ոչ մի ելք չգտնելով, յուսահատ նստեց նրստարանի վրայ և բարձրաձայն լաց եղաւ:

—Ինչո՞ւ ես լալիս, Պարոյր, ասաց յանկարծ մի ձայն:

Պարոյրը յետ նայեց և տեսաւ Ստեփանին:

—Զեմ իմանում որ կողմը գնամ, ճանապարհը կորցրել եմ: Խնդրում եմ ինձ տուն տանես, Ստեփան:

—Ես ինքս ճանապարհները չեմ իմանում. իսկի չգիտեմ, թէ որտեղ պէտք է գիշերեմ:

—Ապա դու որտեղից ես եկել, հարցրեց Պարոյրը:

— Գիւղից եմ եկել, որ մի գործ գտնեմ ինձ համար, բայց ոչինչ չյաջողուեց:

— Ո՞ր գիւղիցն ես եկել:

— Բ. շէնիցն եմ եկել: Բաւական մեծ է մեր գիւղը: Ոչ հայր ունեմ, ոչ մայր. ուզում եմ մի տեղ ծառայութեան մտնել: Իսկ դու հայր ու մայր ունեմ:

— Հայր էլ ունեմ, մայր էլ, դայեակ էլ, Հեղինէ քոյրիկ էլ: Ես դուրս եկայ մի քիչ զբօսներու, այժմ ճանապարհս կորցրել եմ. չգիտեմ հիմա ես ինչ անեմ, ո՞ւր գնամ, ասաց Պարոյրը և լաց եղաւ:

— Ի՞նչ ես լաց լինում, արտասուքով ոչնչի չես:

— Ապա ի՞նչ պէտք է անեմ:

— Գնանք այստեղից. այստեղ այնպէս մութ է, կարծես անտառ լինի, փողոցում լոյս է: Արի մի կառք վարձիր կամ անցորդներից հարցրու և քեզ ցոյց կրտան ձեր տունը:

— Իբրաւ ես ասում, Ստեփան, կառք նստենք ու գնանք մեր տուն: Հայրիկիս ու մայրիկիս կըխնդրեմ, որ քեզ մեզ մօտ պահեն:

— Ի՛է գնանք: Ո՞ր փողոցի վրայ էք ապրում:

— Ն. փողոցի վրայ մենք սեփական տուն ունենք:

Ստեփանը Պարոյրի ձեռքը բռնեց և միասին գնացին:

Երեխաները երկար թափառեցին, բայց ճանապարհը չգտան: Մութն արդէն այնպէս էր պատել, որ բացի ծառերից նրանք այլևս ոչինչ չէին տես-

նում: Ոչ մի շշուկ անգամ չէր լսում: Ծառաստանի միւս կողմը սկսում էր գաշտը: Պարոյրը սաստիկ յոգնել էր և հագիւ էր ոտները քաշ տալիս:

— Ես ճանապարհը չեմ գտնում, ասաց Ստեփանը. գնալով-գնալով գուցէ այնքան հեռանանք, որ մինչև առաւօտ ստիպուած լինենք թափառելու:

— Այժմ ի՞նչ անենք, ի՞նչ, կըկնում էր Պարոյրը: Ի՞նչպէս ցաւում եմ հայրիկիս ու մայրիկիս համար. ինչեր են մտածում նրանք իմ մասին, Ստեփան: Ինչ սև օր էր այսօր ինձ համար. առաւօտեան չարութեան համար ինձ պատժեցին. ամենքը հիւր գնացին՝ իսկ ինձ դայեակի հետ տանը թողին. դայեակը գնաց լուացարարի մօտ, իսկ ես հագայ նոր շորերս և մենակ դուրս եկայ զբօսներու: Ինձ երբէք չեն թողնում մենակ ման գալ, որովհետև փողոցները լաւ չեմ ճանաչում: Խեղճ հայրիկ և մայրիկ ջան. ինչպէս ամաչում եմ և ցաւում, թէ ինչո՞ւ առաւօտեան ներողութիւն չիսնդրեցի ձեզանից. այն ժամանակ այս փորձանքը չէր պատահի: Ա՛խ երանի մի տուն հասնեմ, այլևս երբէք կամակորութիւն չեմ անի: Ես յոգնեցի, Ստեփան..... այլևս չեմ կարող գալ:

— Ի՛է լաւ, մի քիչ նստենք խոտի վրայ:

Երեխայքը նստեցին:

— Ստեփան, եթէ յանկարծ գայլերը գան մեզ ուտեն:

— Ի՞նչ գայլեր, ի՞նչ ես ասում. գայլերը երբէք քաղաքի մօտերը չեն գալիս:

— Ի՞նչ անուելի մուժ գիշեր է, ոչ մի աստղ չէ երևում երկնքում:

— Որովհետև ամպերը բոլոր երկինքը պատել են, ասաց Ստեփանը սարսուռ գգալով:

Երեխայքն երկար մնացին նստած, վախենալով շարունակել ճանապարհը, որովհետև չգիտէին որ կողմը գնան: Յանկարծ մօտեցող կառքի մի ձայն լսուեց: Երեխաները վեր թռան և բղաւելով կառքի կողմը վազեցին:

— Ո՞վ է, կանգնիր, սպասիր:

Ձին կանգնեց և երեխայքը հազիւ նկատեցին մի սայլ, որի մէջ նստած էր մի գիւղացի:

— Ո՞վ էք, ի՞նչ էք ուզում, թափառաշրջիկներ, դոչեց նա:

— Ապէք, մենք թափառաշրջիկներ չենք, մենք մոլորուել ենք, ճանապարհը կորցրել. մեզ քաղաք հասցրու:

— Քաղաք. ի՞նչ էք հրամայում: Ես կառապան չեմ: Մինչև քաղաք էլի մի 7 վերստ կըլինի, իսկ ձիս յոգնած է, մանաւանդ վաղն էլի նորից պէտք է բանի: Գուք ո՞ւմ տանիցն էք:

— Խնդրում եմ մեզ մինչև Ն. փողոցը հասցրու. ես իմ մանէթ կըտամ քեզ, խնդրում էք Պարոյրը:

— Ուրեմն դու հարուստ ես եղել այ թափառական. որ այդպէս է՝ ես 3 ուրբով էլ չեմ գնայ քաղաք: Եթէ ուզում էք՝ նստէք սայլում, ես ձեզ մեր գիւղը կըտանեմ և մի մանէթ կառնեմ ձեզանից:

— Իսկ գիւղը հեռու է, հարցրեց Ստեփանը:

— Հեռու է, ապա ի՞նչ է, պատասխանեց գիւղացին:

— Գնանք Պարոյր, գոնէ մենակ չենք լինի. դաշտումը գիշերը սարսափելի է:

Պարոյրը շուտ համաձայնեց և երկուսով նստեցին սայլում, որը և շարունակեց ճանապարհը: Գիւղացին այլևս ոչ մի խօսք չասաց. երեխայքն էլ չէին վստահանում խօսել և շուտով քուն մտան:





ՊԱՐՈՅՐԸ ԱՆՏԱՌՈՒՄ

Պարոյրը միայն առաւօտեան դէմ զարթեց և բոլորովին չէր հասկանում, թէ որտեղ է ինքը և ինչ է պատահել: Նա պառկած էր ծառի տակ խոտի վրայ և շուրջը բացի ծառերից ու թփերից ուրիշ ոչինչ չէր երևում: Արևը նոր էր գուրս եկել, թռչունները ուրախ ծըլվում էին: Պարոյրը կարծում էր, թէ այս բոլորը երազ է. բայց երբ սարսուռ զգաց՝ ոտի կանգնեց և սկսեց յիշել բոլոր պատահածը:

— Աստուած իմ, ինչ պէտք է լինի իմ վիճակը, ասում էր խղճուկը: Ո՛ւր են Ստեփանն ու այն զիւղացին, որ մեզ սայլումը նստեցրեց. երեւի նրանք ինձ մենակ թողին այս անտառում ու զնացին: Ես մենակ ճանապարհն ինչպէս գտնեմ: Ա՛խ իմ սիրելի ծնողներ, մայրիկ ու հայրիկ ջան: Աստուած իմ, օգնիր ինձ: Պարոյրը ծնկաչոք դառն արտասուքն աչքերին սկսեց աղօթել:

— Հնա՛, զարթեցիր պուճուր աղայ, յանկարծ լըսուեց Ստեփանի ձայնը:

—Ստեփան ջան, դու այստեղ ես. ինձ չես թողել, հեռացել. ես այնպէս սաստիկ վախեցայ:

—Ի՞նչպէս թողնեմ, խղճուկիդ: Դու միամիտ կաց չեմ թողնի քեզ: Իսկ կառապանը այ ինչ խաղ խաղաց մեր գլխին. բերեց-բերեց, մէկ էլ անտառի միջին կանգնեց, թէ—«չէ, եղբայր, ասում է, իջէք հեռացէք ինձանից. ո՞վ գիտէ դուք ովքեր էք: Ձեր պատճառով մի փորձանքի մէջ էլ չընկնեմ»: Ինչքան խնդրեցի, որ մեզ մինչև գիւղը հասցնէ, լսել չուզեց. սայլից իջաւ, վերցրեց քեզ և դրեց ծառի տակը. դու մեռելի նման քնած էիր, ոչինչ չէիր իմանում. ինձ էլ հրեց, դուրս ձգեց, ինքը սայլը նստեց ու քշեց գնաց:

—Ո՛հ Ստեփան, ինչպէս սարսափում եմ. ուրեմն մենք անտառումն ենք գիշերել. հարցրեց Պարոյրը:

Այդպէս է երևում. քեզ համար այնքան սարսափելի չէր, որովհետև դու քնած էիր. իսկ ես ամբողջ գիշերը կողքիդ նստած արթուն մնացի, չէի կարողանում քնել. սաստիկ երկկիւղի մէջ էի: Հէնց որ սկսեց լուսանալ՝ իսկոյն գնացի շրջակայքը նայելու: Ոչ մի տեղ ճանապարհ չէր երևում. վախենում էի քեզանից շատ չհեռանամ, մի գուցէ մոլորուեմ ու քեզ կորցնեմ: Բայց և այնպէս մի շաւիղ գտայ. գուցէ այս շաւիղը մեզ մի ճանապարհի վրայ հանէ: Տես որքան մորի կայ այստեղ. ինչ խոշոր են ու հասած: Դու երեւի քաղցած ես: Երէկ դու ինձ կեռասով հիւրասիրեցիր, այսօր ես քեզ մորիով կըհիւրասիրեմ:

Միայն խնդրեմ ներողամիտ եղիր, բուլկի չունեմ, կատակով ասաց Ստեփանը:

—Այո, քաղցած եմ, բայց մըսում էլ եմ:

—Դէ գնանք մորիով նախաճաշիկ արա. արևն էլ լաւ կըտաքացնէ քեզ և կըլաւանաս: Երեխաները սկսեցին հաւաքել և ուտել մորին, որ շատ առատ էր: Պարոյրը մորին շատ հաւանեց, թէպէտ թաժա հացն ու կաթը այժմ աւելի մեծ ախորժակով կուտէր: Սիրտը ճմլում էր, երբ յիշում էր, թէ ինչպէս տանեցիր գլուխները կորցրած իրան են փնտռում. ինչպէս վարժուհին կըզայ «Գապիկն ու ակնոցը» հարցնելու. ինչպէս կնքահայրն ու բոլոր բարեկամները կիմանան, որ Պարոյրը կորել է. ինչպէս կըբարկանան խեղճ գայեակի վրայ, որ իրան մենակ է թողել: Քանի անգամ խեղճ երեխան դառը ախ էր քաշում և ուզում էր լաց լինել, բայց Ստեփանը աշխատում էր հանգստացնել նրան, ասելով. «արտասուքից օգուտ չկայ, գիւղի պառաւների նման ախ ու վախ անելը չի օգնի». և հաւատացնում էր նրան, որ ինքը ինչպէս էլ լինի անպատճառ կըգտնի Պարոյրի ծնողներին:

—Ահա շաւիղն էլ երևաց, կընշանակէ այստեղ մարդիկ անց ու դարձ են անում. մենք ևս այս շաւիղով կերթանք և երեւի մի տեղ կըհասնենք, ասաց Ստեփանը:

—Ա՛խ, եթէ մենք մի բարի մարդու պատահէինք, որը մեզ այս անտառից դուրս բերէր և մեր տուն հասցնէր՝ ես իմ բոլոր սիրած բաներս նրան

կընծայէի. երևի հայրիկս էլ նրան բան կընծայի: Հայրիկս քեզ էլ կը վարձատրէ Ստեփան, որ ինձ մենակ չես թողել:

— Զարմանալի տղայ ես, Պարոյր, ես ինքս անչափ ուրախ եմ, որ մենակ չեմ. ինչպէս կարող էի քեզ մենակ թողնել, երբ ինքս էլ ոչ մի տեղ չունեմ գնալու: Որբի կեանքը շատ գժուար է:

— Ապա առաջ որտեղ էիր ապրում:

— Մի մօրաքոյր միայն ունէի, նա էլ անցեալ շաբաթ վախճանուեց, այժմ այլևս ոչ մի օթեան չունեմ: Ուզում էի մեր գիւղի նախարարած դառնալ, բայց արդէն գարունքից վարձել էին ուրիշին: Ողորմութիւն խնդրելն էլ ամօթ է. ասացի— քաղաք գնամ, մի գործ որոնեմ: Երկու օր ման եկայ, բայց գործ չգտայ, քիչ մնաց քաղցած մեռնէի: Երէկ միայն դու ինձ հաց տուիր, կերակրեցիր. այդ լաւութեան համար ես երբէք քեզ չեմ մոռանայ:

— Գարգալ գիտես Ստեփան:

— Գարգալ-զրել գիտեմ. երկու տարի սովորել եմ ուսումնարանում. հաշիւ էլ գիտեմ, մի քանի հատ էլ աղօթք: Եթէ ես մի խանութում տեղ գտնէի, այնպէս կը ծառայէի, որ ամենախստապահանջ խանութպանն էլ ինձանից գոհ կը մնար:

— Ես հաւատացած եմ, Ստեփան, որ հայրիկս անպատճառ քեզ կօգնէ, միայն թէ շուտով կարողանանք տուն հասնել:

— Մի տեղ կը հասնենք էլի: Անտառումն էլ շատ լաւ է, ազատ կարող ես շնչել: Իսկի քաղաքի հետ

չեմ փոխի: Մեր գիւղի մօտ էլ այսպիսի մի անտառ կայ և անտառում միայն մի խրճիթ կայ, ուր ապրում է անտառապահը:

— Տես, տես Ստեփան մի խրճիթ է երևում հեռում. շինի թէ դա էլ անտառապահի խրճիթ է, ուրախութեամբ բացագանչեց Պարոյրը:

— Հէնց ուղիղ որ պահապանի խրճիթ է: Այժմ լաւ եղաւ. կը գնանք անտառապահին կը հարցնենք քաղաքի ճանապարհը: Ինչ ուրախութիւն է. փառք Աստուծոյ: Դէ գնանք շուտով:





է

ԵՐԵՆԱՆԵՐԸ ԱՆՏԱՌԱՊԱՀԻ ԽՐՃԻԹՈՒՄ

Պարոյրն ու Ստեփանն ուրախ-ուրախ վազեցին դէպի անտառապահի խրճիթը, որի դռներն ու պատուհանները փակ էին ու ոչոք էլ չէր երևում մէջը:

— Է՛հ հէ, ինչպէս երևում է խրճիթում ոչոք չկայ, ասաց Ստեփանը:

— Այժմ ինչ պէտք է անենք. մեզ տուն ո՞վ կհասցնէ, ասաց Պարոյրն ու սկսեց լալ:

— Դէ հերիք է լաս, հոգիս տըրեցիր: Լացից ինչ օգուտ. բաս ես էլ նստեմ կողքիդ ու սկսեմ գոռալ, ինչ դուրս եկաւ դրանից: Փառք Աստուծոյ մի օթևան ենք գտել. այս գիշեր այստեղ կըպատուաբուենք, իսկ վաղը Աստուած ողորմած է, մի ճար կըգտնենք:

Պարոյրն իսկոյն լռեց. Ստեփանի խօսքերն ու համոզուած ձայնը նրան հանգստացրին: Ստեփանը խրճիթի շուրջը պըտտեց և մտածում էր մի կերպ խրճիթը մտնել:

— Դուռը դրսից բանալիով միայն կարելի էր

բանալ, իսկ ներսից առանց այդ էլ կըբացուէր: Տես այստեղ գոմ էլ կայ, եթէ չկարողանանք խրճիթը մտնել՝ այստեղ կարող ենք գիշերել:

Ստեփանը մտաւ գոմը, ուր ինչպէս երևում էր, մօտ ժամանակներում կով էր կապած եղել: Այնտեղ նա մի կացին գտաւ, որով հեշտութեամբ վերև քաշեց պատուհանի շրջանակը, մտաւ խրճիթը և դուռը ներսից բանալով՝ ուրախ-ուրախ կանչեց.

— Պարոյր, ներս արի. ահա մեզ և տուն. շնորհաւորում եմ նոր բնակարանդ:

Պարոյրը այս անշուք խրճիթը մտաւ ու տեսաւ սև ու մրոտ պատեր, մի մեծ վառարան, հասարակ սեղան, նստարան ու պահարան: Ստեփանը պահարանը բացեց և երբ տեսաւ կյոր սև հացը, բարձրաձայն կանչեց.

— Պարոյր ջան, մենք իսկոյն մի փառաւոր ճաշ կուտենք, երևի դու այնպէս քաղցած ես, որ այս սև հացը գաթայի պէս կուտես: Մօտ եկ սեղանին, ահա դանակ. մեր գիւղական հացի համը տես. ես հօքացից մեռնում եմ:

Ստեփանը սեղանը թևերով սրբեց և ճարպիկութեամբ շոր հացից մի քանի կտոր կտրեց, դարսեց Պարոյրի առաջ և փայտէ աղամանն առաջ քաշեց. ապա մի կտոր հաց վերցրեց, վրան աղ ցանեց և ջրի դոյլը (վեզըօ) վերցնելով, ասաց Պարոյրին, որ ինքը իսկոյն աղբիւրից ջուր կըբերէ: Պարոյրը մեծ բաւկանութեամբ ուտում էր հացը աղով և միևնոյն ժամանակ զարմանում, թէ ինչո՞ւ իրանց տանը այս-

պիտի համեղ հաց չեն ունենում: Սառը ջուրն էլ ուղղակի դոյլից խմելով, Պարոյրը բոլորովին զուարթացաւ ու սիրտ առաւ:

— Փառք Աստուծոյ կշտացանք, երեսը խաչակնքելով ասաց Ստեփանը. այժմ գործի կպչենք: Վերջրու այս գաւաթը և գնահատի հաւաքիր, աղբիւրի մօտ շատ-շատ կայ, միայն տես հեռու չգնաս. իսկ ես սենեակը կարգի կը բերեմ, վառարանը կը վառեմ— փայտ շատ կայ, լուցկի էլ կայ. գիշերը տաք կը քնենք:

— Հապա տուն երբ կերթանք, Ստեփան:

— Մի քիչ համբերիր Պարոյր. թող մի քիչ տունը կարգի բերեմ, յետոյ քեզ կը թողնեմ այստեղ, իսկ ես կը գնամ ճանապարհ փնտռելու:

— Ես ոչ մի դէպքում այստեղ մենակ չեմ կարող մնալ:

— Եթէ քեզ հետս տանեմ, իմացիր, որ շատ բան չենք շինի. դու մէկ կասես յոգնեցի, մէկ էլ լաց կը լինես: Իսկ առանց քեզ ես մի ըրպէս ապահով կը վազեմ. գուցէ և անտառապահին կը հանդիպեմ կամ մօտիկ մի գիւղ կը գտնեմ:

— Իսկ եթէ դու անտառում մոլորուես, ես հայստեղ մենակ կը կորչեմ:

— Դու էլ բան ասացիր. քաղաքումն աւելի հեշտ կարելի է մոլորուել, քան թէ անտառում: Ճանապարհին ես նշաններ կանեմ: Դէ գնահատի քիչ զբաղուի մօրիով. միայն տես, էլ չլաս:

Ստեփանը սկսեց սենեակը կարգի բերել. վառարանը վառեց, կաթսայով ջուր դրեց կրակի վրա

յետոյ մտաւ նկուղը, այնտեղ գտաւ թարմ ձուաներ, գետնախնձոր, սոխ և էլի մի կտր հաց: Ստեփանի ուրախութեանն էլ չափ չկար: Յետոյ պահարանի տակը տեսաւ մի պոռնիկ թէյաման, երեք հատ թէյի բաժակ, և թղթի մէջ փաթաթած քիչ թէյ ու միքանի կտոր շաքար:

Այս լաւ բան եղաւ, ուրեմն թէյ էլ անուշ կանեք, ասում էր Ստեփանն ինքն իրան: Անտառապահի մտքովն էլ չի անցնի, որ իւր տանը հիւրեր կան ու կարգադրութիւններ են անում:

Ստեփանը բոլոր գործերը վերջացրեց, թէյամանի մէջ թէյ ածեց և դուրս եկաւ Պարոյրին փնտռելու, որ խրճիթից ոչ հեռու մօրի էր ժողովում:

— Ի՞նչ քաջ ես Պարոյր, այդ ինչ շատ ես ժողովել: Այդքան մօրիին մեր քաղաքացի պարոնները 15 կոպէկ կը տային: Ես առաջ շատ անգամ այդպէս ժողովել եմ ու տարել քաղաք ծախելու: Պարոյր, հիմա գնանք աղբիւրը լուացուենք. խրճիթում սապոն և երեսուրբիչ էլ գտայ, յետոյ գնանք խրճիթը և տես ինչպէս կը հիւրասիրեմ քեզ:

Ստեփանը լաւ դայեակի նման Պարոյրի երեսը լուաց, մազերը սանրեց, յետոյ տարաւ խրճիթը և ցոյց տուեց այն բոլոր մթերքները, որ գտել էր անտառապահի նկուղում. ապա ուրախ նստեցին և համով թէյ խմեցին: Երբ թէյը վերջացրին, Ստեփանը պատրաստուեց գնալ ճանապարհը ուրոնելու:

— Ես այստեղ չեմ մնայ Ստեփան, ասաց Պարոյրը, ես մենակ վախենում եմ:

— Ինչո՞ւ ես վախենում. ցերեկ է, գիշեր չէ, ումից ես վախենում: Դեռ մուլթը չընկած՝ ես այստեղ կըլինեմ: Եթէ ուտել ուզենաս, ահա հաց. այստեղ սոխ էլ կայ, սոխով ու ադով հացը շատ համեղ է: Դու քիչ տաշեղ հաւաքիր. յետոյ նորից մորի ժողովիր. մինչև իմ գալը դրանով կըզբաղուես ու չես ձանձրանայ: Երբ մի՞նի, մտիր խրճիթը, դուռը լաւ փակիր, աղօթքդ արա ու պառկիր. իսկ ես դարձեալ պատուհանից ներս կըմտնեմ:

— Եթէ անտառապահը վերադառնայ հօ ինձ աւագակ կըկարծէ և կըսպանէ:

— Տէր Աստուած. ո՞վ պէտք է քեզ աւագակ կարծէ, երբ դու մի փետրած հաւի նման բան ես և ուրիշ ոչինչ: Աւելի լաւ է եթէ անտառապահը գայ, դու նրան բոլորը կըսպասես. թէ ինչպէս այստեղ ընկար և կասես, որ եթէ քեզ ծնողներիդ մօտ տանի, նրանք շատ փող կընծայեն իրան: Միայն տես առանց ինձ չգնաս, սպասիր մինչև ես վերադառնամ, ես էլ պէտք է քաղաք գամ:

— Ես առանց քեզ ոչ մի տեղ չեմ գնայ, Ստեփան, միայն դու շուտ վերադարձիր, ճանապարհդ չկորցնես:

— Դու մի վախենա. գնալիս ճանապարհին պատահած թփերի ճիւղերը կըկտրատեմ, որ նշան լինի և նորից նոյն ճանապարհով կըվերադառնամ, այդ ես գիտեմ: Դէ մնաս բարեաւ, քաջ եղիր, ոչորից մի վախենա և տես՝ չլաս:

Ստեփանը ջուր խմեց, մի կտոր հաց առաւ կըռան տակը և ճանապարհ ընկաւ դէպի անտառի խորքը:




Ը

ՍՏԵՓԱՆԸ ՃԱՆԱՊԱՐՀ Է ՓՆՏՈՒՄ

Ստեփանը ման էր գալիս անտառի շաւիղներով, որոնք բոլորն էլ տանում էին դէպէ միևնոյն խրամատը (փորած երկար փոս): Ստեփանը համոզուելով որ այդ անտառում ոչ մի բնակուած չկայ, երկար թափառելուց յետոյ յուսահատուած, կտորտած թրփերի նշաններով, քայլերը նորից ուղղեց դէպի անտառապահի խրճիթը:

Արևը մայր մտաւ: Անուշահոտութեամբ լցուած օդը զովացաւ: Բազմաթիւ սոխակներ և գանազան թռչուններ սկսեցին երգել իրանց քաղցր երգերը: Այս սիրուն բոպէին անտառում այնքան լաւ և դուրեկան էր, որ Ստեփանը ուրախութեամբ կըմնար անտառապահի խրճիթում, քանի որ այնտեղ եղած ուտելու պաշարը կըբաւականանար: Սակայն Պարոյրի զրուածները նրան շատ էր անհանգիստ անում, ուստի վճռել էր ամեն ջանք գործ գնել և նրան իւր ծնողների մօտ տանել, հասցնել: Նա իւր մասին բո-



լորովին չէր մտածում, որովհետև նրա այսօրուայ կեանքն առաջ անց կացրած կեանքից աւելի լաւ էր: Վաղը առաւօտեան հակառակ կողմը կերթամ, մտածում էր նա. անկարելի է, որ այս մօտերքում մի գիւղ կամ մի անց ու դարձի ճանապարհ չլինի: Պարտոյրն էլ հետո կը վերցնեմ. մենակ թողնել լաւ չէ: Նա ոչինչ չէ իմանում, չէ հասկանում: Ով գիտէ այժմ արդէն տրդգոցը գցել է: Ստեփանը քայլերն արագացրեց, թէպէտ սաստիկ յոգնել էր, որովհետև առաւօտից մինչև երեկոյ առանց հանգստանալու ման էր եկել: Խրճիթը շուտով երևաց: Պարտոյրը շէմքումը նստած աջ ու ձախ էր նայում և ամեն մի շշուկի ահանջ դնում:

— Պարոյր, ահա ես եկայ: Առանց ինձ ինչպէս անց կացրիր, հօ չտխրեցիր:

— Ո՛հ, ինչ սարսափելի է անտառում մենակ լինել: Ի՛նչ ուրախ եմ Ստեփան, որ եկար. ես վախենում էի խրճիթը մտնել պառկել: Ասա խնդրեմ, գլխիդ անտառապահին:

— Ոչոքի չտեսայ: Այս կողմը ամբողջապէս խիտ անտառ է, ոչ մի ճանապարհ չկայ: Ամբողջ օրը իզուր շրջեցի: Վաղը մենք միասին կերթանք հակառակ կողմը. իսկ այժմ լաւ կըլինի ընթրենք և պառկենք քնելու: Արի մի լաւ ձուածեղ շինենք և օրհնենք այս տան տիրոջը, որ մեզ համար պաշարեղէն է պատրաստել: Բայց եթէ ինքը վերադառնայ՝ երևի շատ էլ շնորհակալ չի լինի, որ նրա ունեցած շունեցածը փորերս ենք քաշել:

— Ես իմ ուրբլիս կըտամ նրան:

— Ես էլ իմ արասին կաւելացնեմ և բանը կըզրատուի, ծիծաղելով ասաց Ստեփանը: Ինչ քնջ ես, Պարոյր, այստեղ փայտ ես պատրաստել:

— Տես, Ստեփան ես սունկ էլ եմ հաւաքել:

— Ցոյց տուր տեսնեմ, չի՛ննի թէ թունաւոր լինեն: Զէ, սորա լաւ տեսակից են, ուտել կարելի է: Մի քիչ սպասիր, իսկոյն կըակ կանեմ և մի լաւ ապուր կեփեմ: Դէ վառարանում փայտ դարսիր, ահա և լուցկին, սովորիր ինչպէս պէտք է կըակ վառել: Հը, ինչ ես սըփրթնել ու դողում տերևի նման:

— Մաստիկ մըսում եմ, գլուխս էլ ցաւում է:

— Դէ, գնա քիչ թէք ընկիր, իսկ ընթրիքից յետոյ վառարանի մօտ կըպառկեցնեմ քեզ քնելու:

— Ինչ բարի ես դու Ստեփան, ես առանց քեզ ինչ պէտք է անէի:

— Լաւ, լաւ, պառկիր մինչև ես բոլորը պատրաստեմ:

— Այսօր դու շատ ես աշխատել Ստեփան, երևի յոգնել ես, բայց ինչ անեմ, որ չեմ կարող քեզ օգնել: Երանի թէ ես էլ քեզ նման խելօք լինէի:

— Կըմեծանաս, կըխելօքանաս: Դու ասան փառք տանք Աստծուն, որ երէկ ծառի տակին քաղցած գիշերեցինք, իսկ այսօր կուշտ ու տաք նստած ենք սենեակում: Թէ ինձ կըհարցնես, անտառում այսպիսի կեանքը հրաշալի է: Ես երբ մեծանամ՝ անտառապահ կըդառնամ: Դու էլ ինձ մօտ այն ժամանակ հիւր կըգաս և մենք միասին կերթանք գրօսնելու: Բայց

շատ կափսոսամ, եթէ քեզանից բաժանուեմ. մենք լաւ բարեկամացանք: Ես երեխայ շատ եմ սիրում: Չատ անգամ դիւզումը, երբ երեխաներն ուզում էին զայրացնել ինձ՝ դայեակ էին ասում, բայց ես բոլորովին չէի վիրաւորում, որովհետև իսկապէս ես երեխայ շատ եմ սիրում:

Այսպէս խօսելով՝ Ստեփանը վառարանը վառեց, սունկը լուաց, սոխ կոտորեց, ածեց պղինձը, աղաբեց, ջուր ածեց և զրեց կըակի վրայ: Ետոյ առանձին թաւի մէջ էլ ձուածեղ շինեց:

— Ահա ընթրիքը պատրաստ է, նստիր Պարոյր, ուտենք. տես ինչ լաւ ապուր եմ եփել:

— Չատ համեղ է. ասան խնդրեմ, ո՞վ է սովորեցրել քեզ կերակուր եփել:

— Մի՛թէ մեծ գիտութիւն է հարկաւոր դըրահամար: Չատկական տօներին, երբ ես Պօղոս քեռուս մօտ էի ծառայում՝ ապուր էլ էի եփում, խորոված էլ էի անում: Վաղը փլաւ կեփեմ, տես ինչ լաւը կըլինի: Դէ կեր, կեր սիրելիս, դու բոլորովին նուազել ես, մի քիչ կազդուրուիր, որ վաղը նորից գնանք թափառենք, ճանապարհը գտնենք:

— Աւելի լաւ է՝ ես կըպառկեմ Ստեփան, ուտելու ախորժակ չունեմ:

— Այդ ինչպիսին ես տօ. ուտելու շնորհք էլ չունես. դէ գնան շորերդ հանիր ու պառկիր վառարանի մօտ:

Ստեփանն օգնեց Պարոյրին՝ շորերը հանեց ու պառկեցրեց, ինքն էլ ընթրիքի մնացորդները հաւաքեց ու պառկեց քնելու:



Թ

Մ Ր Ր Ի Կ

—Վեր կաց, Պարոյր, ասաց Ստեփանը նկատելով որ ընկերը գլուխը վեր է բարձրացրել: Այսօր նորից պէտք է շրջագայենք. վեր կաց, ես իսկոյն նախաճաշիկը կըտաքացնեմ:

—Ինչո՞ւ այսպէս մութ է. արևն էլ չէ երևում:

—Ամպած է, անձրև պէտք է գայ, ասաց Ստեփանը:

—Ապա մենք ինչպէս կերթանք:

—Ոչինչ, շաքարից չենք շինած, որ հալուենք. անձրևը կըթրջէ, արևն էլ կըշորացնէ:

Պարոյրը կամաց կամաց վեր կացաւ և սկսեց հագնուել. գըզգզուած մազերը հարթեց և գնաց առուակը լուացուելու: Գլուխը դարձեալ ցաւում էր, ոտքերը դողում էին:

—Ի՞նչ կասէր դայեակս, եթէ ինձ այժմ այսպէս տեսնէր—շորերս անմաքուր, գուլպաներս պատառտած, կօշիկներս էլ ծակծակուել են: Երանի իմանայի, թէ այժմ մեր տանն ի՞նչ են անում:

Ա՛խ Աստուած իմ, երբ ես մեր տունը կըհասնեմ: Այնպէս սաստիկ է ցաւում գլուխս, որ եթէ տանը լինէի՝ մայրիկս չէր թողնի անկողնից վեր կենալու:

Ստեփանը նախաճաշն արդէն տաքացրել էր և առաջարկում էր Պարոյրին, որ ուտեն ու յետոյ ճանապարհ ընկնեն:

—Դէ այժմ բարով գնանք: Ահա պայուսակում հաց, գետնախնձոր և սոխ եմ գրել ճանապարհի համար: Գու ղո՛ւրս արի, որ ես դուռը ներսից այնպէս կողպեմ, ինչպէս առաջ կողպած էր, գուցէ այլևս չենք վերադառնայ. իսկ ես պատուհանից դուրս կըգամ:

—Ստեփան, տես ինչ սև-սև ամպեր են հաւաքուել, անպատճառ անձրև կըգայ:

—Անպատճառ փոթորիկ կըլինի. եթէ կուզես այսօր էլ այստեղ մնանք:

—Ո՛չ, ո՛չ, վախեցած ասաց Պարոյրը. աւելի լաւ է շուտ գնանք:

Երեխաները քայլերն ուղղեցին դէպի այն կողմը, որտեղից եկել էին առաջին օրը: Սև-սև ամպերից անտառը համարեա մթնել էր. փայլակն երբեմն-երբեմն շանթում ակօսում էր նրան: Ստեփանը շատ էր աշխատում համոզել Պարոյրին, որ յետ դառնան խըրճիթը:

—Ո՛չ, Ստեփան, շարունակենք ճանապարհը. դու ինքդ ես ասում, շաքարից չենք որ հալուենք: Գուցէ պատահենք մէկին, որ հենց այսօր մեզ տուն տանի:

Միքանի բոպէից ամպը սաստիկ որոտաց և անձրևի խոշոր կաթիլներն սկսեցին թափուել:

—Վերադառնանք խրճիթը, Պարոյր. ինչպէս տեսնում եմ, սաստիկ փոթորիկ է լինելու, ասում էր Ստեփանը. երբ եղանակը պարզուի՝ նորից ճանապարհ կընկնենք:

—Զէ, չեմ ուզում, տես անձրևն արդէն դադարեց, ասաց Պարոյրը:

Եւ անձրևի կաթիլներն իսկապէս սկսեցին նորանալ և մինչև անգամ արև դուրս եկաւ: Երեխայքը խրախուսեցան և շարունակեցին իրանց ճանապարհը: Զատ գնալուց յետոյ վերջապէս նրանք դուրս եկան կանաչ, ծաղկազարդ դաշտը: Սակայն մեր հոգատար Ստեփանը չէր մոռանում անցած ճանապարհի վրայ նշաններ թողնել. նա երբեմն թփի ճիւղերն էր կտրատում, երբեմն բարձր խոտերի գլխներէց փնջեր կապում: Այս ճանապարհը գուցէ մեզ էլի հարկաւոր լինի, մտածում էր Ստեփանը:

—Պարոյր, դու հազիւ ես քաշ տալիս ոտներդ, երեւի յոգնել ես, եկ այստեղ նստենք, մի քիչ հանգստանանք:

Պարոյրը ոչ թէ նստեց, այլ ուղղակի վայր ընկաւ խոտերի մէջ, գանգատուելով սաստիկ գլխացաւից, և իսկապէս այնպէս գունատուել էր խեղճ երեխան, որ մեռելի նման էր դարձել:

Է՛հ, բարեկամս, ինչպէս տեսնում եմ՝ դու կրհիւճանդանաս, և այն ժամանակ չգիտեմ ես ինչպէստէս անեմ:

Մըրիկը սկսուեց: Սաստիկ քամի բարձրացաւ, ծառերը սկսեցին ճռճռալ: Ամպը այնպէս խիստ որոտաց, որ մինչև անգամ Ստեփանը ցնցուեց. հանեց գլխարկը և երեսը խաշակնքեց: Պարոյրը վախեցած վեր թռաւ և սկսեց այս ու այն կողմը նայել:

—Ստեփան, մենք կայծակնահար կըլինենք:

—Ես էլ այդ էի ասում, որ մնայինք խրճիթում մինչև եղանակը պարզուէր: Դէ, ինչ անենք. արի վազէվազ գնանք. տես քամին յետեիցն է, այնպէս որ մեզ հեշտութեամբ առաջ կըտանի մինչև մեր խրճիթը:

Ստեփանը Պարոյրի ձևօքիցը բռնեց, տեսաւ որ նա ամբողջ մարմնով դողում է և հազիւ է կարողանում ոտքի վրայ կանգնած մնալ:

—Պարոյր, դու դողում ես, ման դալ չես կարող, եկ քեզ շալակեմ տանեմ:

Ստեփանը չոգեց, առաւ Պարոյրին ուսի վրայ, պարկն էլ ձեռին և շտապ—շտապ առաջ գնաց: Պարոյրը ամուր փաթաթուել էր նրա վզով:

—Է՛հ գուքնքոյշ պարոնիկ, ինչ թեթեւ ես, կարծես փետուր լինես: Ի՛նչ քո բանն էր մենակ տանից դուրս գալ ու կորչել: Այժմ գնանք խրճիթը, դու մնա այնտեղ, իսկ ես մենակ կերթամ ճանապարհը փրնտուելու:

Պարոյրը չէր պատասխանում. նա գլուխը դրել էր Ստեփանի ուսին և կարծես քնել էր: Քամին սաստիկ սուլոցով փչում էր և ծառերն օրօրում, բարձր խոտն էլ ալիքների նման այս ու այն կողմն էր գնում: Անձրևն աւելի սաստկացաւ և առուակի նման թափ-

լուսմ էր Պարոյրի մէջքին ու Ստեփանի վզին: Ստեփանը իւր բեռը ուսին դժուարութեամբ էր առաջ գնում: Վերջապէս նա հասաւ անտառապահի խրճիթը: Պարոյրը անդգայ կպել մնացել էր Ստեփանի ուսերին և ձայն-ծպտուն չէր հանում: Ստեփանն ստիպուած կուշ եկաւ, կուացաւ գետին և մի կերպ նրան վայր իջեցրեց: Պարոյրը սփրթնած դարձեալ անշարժ էր մնում:

— Աստուած իմ, այժմ ես ինչ անեմ, ասում էր Ստեփանը զարհուրած:

Պատուհանից շտապով ներս գնաց խրճիթը, դուռը բացեց, վերցրեց Պարոյրին ներս տարաւ, դրեց մահճակալի վրայ, դողդոջուն ձեռքերով հանեց նրա թաց շորերը և մօտն ընկած կոշտ տոպրակով սկսեց շփել Պարոյրի ամբողջ մարմինը: Բանից երևաց որ այդ շփումը շատ մեծ օգուտ բերեց:

Պարոյրի մարմինը սկսեց կարմրել և դեղնած երեսն էլ վարդի գոյն ստացաւ. կոպերը սկսեցին շարժուել և Պարոյրն աչքերը բանալով՝ շունչ քաշեց: Բարեբախտաբար խրճիթը շատ տաք էր: Ստեփանը տոպրակով ծածկեց Պարոյրին, նորից վառարանը վառեց, ինքն էլ շորերը հանեց, բոլորը լաւ քամեց և կրակի առաջ փռեց շորանալու: Անձրևը դադարեց: Արևը դուրս եկաւ: Կարծես մրրիկը հէնց դրա համար էր, որ խեղճ երեխաներին թրջէ և նորից խրճիթը քշէ:





Ժ

ՊԱՐՈՅՐԻ ՀԻՒԱՆԳՈՒԹԻՒՆԸ

Ստեփանը Պարոյրից չէր հեռանում. նա ամեն կերպ աշխատում էր զբաղեցնել և սիրտ տալ նրան: Խեղճ Պարոյրը աչքերը յառել էր մի կէտի և տնքում էր. յետոյ սկսեց զառանցել—երբեմն իւր դայեակին էր կանչում, երբեմն մօրը, շուտ-շուտ ջուր էր պահանջում, ապշած աջ ու ձախ նայում, իսկ Ստեփանին այլևս չէր ճանաչում:

Ստեփանը զնաց մարաքից մաքուր խոտ բերեց, Պարոյրի տակը փռեց, անկողին շինեց, արդէն չորացած շապիկը նորից հագցրեց և զլիսատակն էլ խոտէ բարձ շինեց: Այնպիսի հանգամանքներում սրանից աւելի բան չէր կարելի անել:

Ստեփանն այնքան սիրեց իւր փոքրիկ ընկերօջը, որ պատրաստ էր նրա համար իւր կեանքը զոհել, միայն թէ կարողանար նրան մի կերպ օգնել. ինքը համարեա քաղցն էլ, քունն էլ մոռացել էր:

Այսպէս անցաւ երեք օր: Պարոյրը երբեմն զառանցում էր, երբեմն աչքերը շուարած խղճալի հա-

յացքով մնում էր միակերպ: Վերջապէս շորրորդ օրը երեկոյեան Պարոյրը կարծես քիչ հանգստացաւ: Ստեփանն էլ սաստիկ յոգնած՝ կուշ եկաւ նրա անկողնի առաջ ու պինդ քնեց:

Ստեփանը երբ առաւօտեան վեր կացաւ և Պարոյրին անկողնում տեսաւ նստած՝ սաստիկ ուրախացաւ: Պարոյրը նայեց իւր քնաթաթախ զրզգոտած մազերով խնամակալին ու ժպտաց: Ստեփանը վեր թռաւ տեղից արտասուքն աչքերին, փաթաթուեց, զրկեց Պարոյրին և սկսեց համբուրել նրա դեղնած այտերն ու նիհար ձեռքերը:

— Պարոյր ջան, ուշքի եկար: Ո՛հ ինչպէս վախեցրիք ինձ: Ես կարծում էի թէ կըմեռնես: Մի քիչ բան կեր սիրելիս. ուզում ես քեզ համար թէյ պատրաստեմ իսկոյն:

— Այո՛, թէյ տուր ինձ Ստեփան, նուազած ձայնով ասաց Պարոյրը:

— Իսկոյն, հոգիս: Փառք Աստուծոյ, այժմ քեզ լաւ ես զգում: Բայց ես ինչ երազ տեսայ—իբր թէ մեր գիւղումն ենք, հանգուցեալ մօրաքոյրս մօտենում է ինձ և ասում. «Ստեփան, ինչո՞ւ ես մոռացել անտառի միւս մասի պահապան զինուոր Վրթանէսին. վեր առ Պարոյրին և տար նրա մօտ:» Արթնացայ յանկարծ. կարծես ինձ մէկը բօթեց և սարսուռ եկաւ վրաս: Աստուած իմ, ինչպէս մինչև հիմա զլիս չընկայ. չէ որ այժմ ես կարողանում եմ յիշել թէ մենք ո՞ր կողմից եկանք. քանի՛ անգամ եմ անցել ես այս տեղով, հէնց այս խրճիթի մօտով: Այժմ

ես յիշում եմ, թէ որ կողմն է մեր գիւղը, նրա մօտի քաղաքացու ամարանոցը և Վրթանէս անտառապահի խրճիթը: Վրթանէս քեռին միշտ ման է գալիս անտառի այս ու այն մասում. բայց այժմ ո՛ւր է կորել, որ մեզ չէ պատահում: Նա խելօք մարդ է, մեր դարդին դարման կանէր ու վաղուց քեզ քաղաք կրտանէր: Ի՞նչ տխմարն եմ ես. ինչպէս շճանաչեցի այս անտառը: Ես իսկոյն կերթամ Վրթանէս քեռու մօտ. բայց քեզ ինչպէս մենակ թողնեմ:

—Ո՛չինչ, Ստեփան, դեռ լոյս է, ես չեմ վախնում. ինձ թէյ խմեցրու և շուտ գնա՛. ես ուզում եմ մեր տունը գտնել: Ասա՛ խնդրեմ, քաղաքը ձեր գիւղից ո՞րչափ հեռու կրլինի:

—Քսան վերստ կրլինի: Օ՛հ, ես յիմարս, յիմարս, կրկնում էր Ստեփանը և Պարոյրի համար թէյ ածում: Գոնէ Վրթանէս քեռին այս կողմով անցնէր: Գէ Պարոյր, հանդիստ պառկիր, ահա քեզ հաց և թէյ. գուցէ ծարաւես: Իսկ ես շտապով կըզնամ կամ Վրթանէս քեռուն կըբերեմ հետս կամ ամարանոցի տիրոջը էրխնդրեմ, որ քեզ իրանց մօտ տանեն: Այնտեղի տիկինը շատ բարի է, ես նրան ճանաչում եմ, նա քեզ կըզթայ. ես մինչև անգամ կարծում եմ, որ քեզ համար ձի կուղարկեն, որ ոտով չզնաս:

Ստեփանը սեղանն առաջ քաշեց, թէյը դրեց վրան, մի կտոր էլ հաց կտրեց ու դրեց մօտը. ապա գլխարկը ծածկեց և ուրախ—ուրախ ճանապարհ ընկաւ դէպի Վրթանէս քեռու խրճիթը: Այժմ նա արդէն իմանում էր, թէ որ կողմը գնայ. այլևս ոչ նշան-

ներ էին հարկաւոր և ոչ շաւիղներ: Քառորդ ժամից յետոյ նա դուրս եկաւ բաց դաշտը, որտեղից արդէն երևում էր գիւղը իւր սպիտակ գմբէթաւոր եկեղեցիով: Ստեփանը սկսեց բոլոր ոյժով վազել և երբ հասաւ ծայրի խրճիթին, բոլորովին կարմրատակած, հեալով ներս ընկաւ:

—Քեռակին, ո՛ւր է Վրթանէս քեռին, բղաւեն Ստեփանը:

—Ի՞նչ ես աղաղակում, տօ, կրակ ընկած, ինչպէս վախեցայ, բարկացած ասաց քեռակինը, որ թոնքի մօտ նստած հաց էր թխում:

—Քեռակին ջան, շուտ ասա՛, ո՛ւր է նա:

—Ի՞նչ պէտք է անես, փուշ կենդանի, անտառը հօ կրակ չէ ընկել, ի՞նչ ես լեզուդ կախ ձգել հետում:

—Մի բարկանար, քեռակին, ասա իսէր Աստուծոյ, ո՛ւր է Վրթանէս քեռին:

—Եկեղեցի է գնացել. չէ որ այսօր կիրակի է:

Ստեփանը շտապով դուրս թռաւ բակից:

—Չլինի թէ իսկապէս հրդեհ կայ, վախեցած ասաց Ջուշանն ու դուրս վազեց, որ տեսնէ ինչ կայ դուրսը: Ստեփանը բոլոր ուժով վազում էր դէպի եկեղեցին: Գուցէ անտառն է այրւում, ասում էր Ջուշանն ինքն իրան: Ահա մի շաբաթ է Վրթանէսը այնտեղ չէ եղել: Կամ գուցէ աղէն է կանչում. չկարողացայ տեղովը հարցնել: Անպիտանը խելառ է. ախար ծեծող չունի է: Ո՛նց է վազում թշուառականը:

Երբ Ստեփանը եկեղեցուն մօտեցաւ առաւօտեան ժամն արդէն վերջացել էր և ժողովուրդը ցըր-

ւում էր: Ստեփանը զլխարկը հանեց և մտաւ եկեղեցի: Վրթանէս քեռին երեցփոխի մօտ կանգնած՝ զրոյց էր անում:

—Քեռի, ասաց Ստեփանը թևից քաշելով, եկ քեզ բան ունեմ ասելու:

—Ի՞նչ ես ուզում:

—Արի, դուրսը կասեմ:

—Այդ ինչի նման ես Ստեփան, միթէ կարելի է այդպէս անկարգ ու կեղտոտ մտնել Աստուծոյ տունը. ո՞ւր ես քաշում ինձ:

—Վրթանէս քեռի, գնանք դուրս, իսէր Աստուծոյ, ես ուղղակի անտառից քեզ մօտ եմ գալիս, գործ կայ:

—Անտառիցն ես գալիս. ինչ գործ է այդ:

Ստեփանը սկսեց պատմել իւր և Պարոյրի պատմութիւնը և այնպէս շտապ-շտապ վրայ տալով, որ Վրթանէսը ոչինչ չհասկացաւ:

—Դու ցնդել ես Ստեփան, ինչպէս տեսնում եմ: Այդ ո՞ւր ես կորել. քեզ վաղուց փնտռում եմ, համարեա մօրաբրոջդ մահուան օրից սկսած: Դու խելօք և լաւ տղայ էիր. ուզում էի օգնականս լինես. իսկ դու քաղցից, թէ վշտից խելքդ բոլորովին կորցրել ես:

—Ես խելքս չեմ կորցրել քեռի ջան, դու մի լաւ լսիր. շուտով գնանք անտառապահի խրճիթը. տղան այնտեղ մենակ է ու շատ հիւանդ է, էլ երեսին գոյ՞նչ է մնացել:

—Այդ ինչ տղայ է, աղայի երեխաները բոլորն էլ աղջիկ են:

—Քաղաքիցն է, անունը Պարոյր է, հարուստ մարդու որդի է, շատ լաւ շորեր ունի հագած. նրանց տունը ամենազլխաւոր փողոցի վրայ է, ասաց Ստեփանը:

—Ապա ինչպէս է ընկել պահապանի խրճիթը:

—Ճանապարհը կորցրել է, ասում եմ քեռի, մենք երկուսով միասին էինք, ես էլ անտառը չճանաչեցի. երազումս մօրաբրոյրս եկաւ և ճանապարհը սովորեցրեց:

—Ախր ասում եմ խելքդ կորցրել ես, տես ինչեր ես դուրս տալիս: Գնա՛ որդի մեր տուն, քեռակինդ մի բան կըտայ ուտելու, կեր և ապա պառկիր քնիր, գուցէ այդ բոլորն անցնի:

—Վրթանէս քեռի, աղաչում եմ, հաւատա՛ խօսքերիս, ես բոլորը ուղիղ եմ ասում:

—Ապա ո՞ւր էիր կորել չքացել, որ քո մասին ոչ մի տեղեկութիւն չունենք:

—Գնացել էի քաղաք գործ գտնելու. ես քեզ բոլորը մանրամասն կըպատմեմ, միայն իսէր Աստուծոյ այժմ շուտ գնանք Պարոյրի մօտ, վախենում եմ՝ չլինի մի բան պատահի, նա մենակ է:

—Այսօր կիրակի է, որդի, դեռ պատարագին կերթամ, յետոյ կըճաշեմ և ապա անտառ կըգնամ: Աղայի հետ որսի էի գնացել, երէկ երեկոյեան միայն վերադարձայ, դեռ կարգին չեմ էլ հանգստացել:

—Քեռի ջան, ախար նրան այդպէս թողնել չի կարելի. ես կերթամ ամառանոցի տիրոջ մօտ, նա բարի է, կըզթայ Պարոյրին: Եթէ այնպէս թողնենք՝

երեխան կըմեռնի, ինչ պէտք է անենք այն ժամանակ:

Ստեփանը սկսեց լաց լինել և իւր կեղտոտ ձեռներով արցունքը սրբել, որով և ամբողջ երեսը կեղտոտեց:

—Տօ՛, ո՞նց ես գնալու ազոնց տուն, նրանք քեզ պէս փնթիին վզակոթին տալով դուրս կանեն: Մի կարգին խօսել էլ չես իմանում, կարծես խելառ ես: Աղէն դեռ քնած կըլինի. նա ուշ է վեր կենում: Եթէ ասածդ ուղիղ է, պէտք է ձին լծել և անտառից երեսին այստեղ բերել:

—Հաւատացնում եմ քեռի, որ բոլորը ճիշտ եմ ասում. ուրեմն թո՛յլ տուր գնամ ձիդ լծեմ: Մինչև դու կամաց-կամաց տուն հասնես՝ ես կըվազեմ և ամեն ինչ կըպատրաստեմ: Եւ Ստեփանը պատասխանի չսպասելով՝ վազեց դէպի քեռանց տուն:

—Երանի թէ քեռակիներ չթակի ինձ, ծիծաղելով մտածում էր Ստեփանը. գալիս նրան շատ վախեցրի: Նա շատ բարկացկոտ է. Պարոյրին նրա մօտ չեմ տանի. կասեմ քեռուն, որ ուղղակի աղսյի տուն բերի: Ես գիտեմ, նրանք Պարոյրին կըխնամեն և հօրն ու մօրն էլ իմաց կըտան: Օ՛հ, փառք Աստուծոյ, մի քիչ սիրտս թեթեւացաւ, Պարոյրն էլ սաստիկ կուրախանայ:

✂ ԿԿ



ԺԱ

ՊԱՐՈՅՐԸ ԱՂԱՅԻ ՏԱՆԸ

Մի կէս ժամից յետոյ Ստեփանը սայլակում նըստած, ձիու սանձը ձեռին, քեռու հետ միասին ճանապարհ ընկաւ դէպի անտառը:

Ճանապարհին քեռին բոլոր մանրամասնութիւններն իմացաւ, ուստի շտապով առաջ էր գնում՝ վախենալով մի գուցէ մենակ մնացած Պարոյրին մի բան լինի պատահած:

Երբ նրանք մօտեցան անտառապահի խրճիթին՝ Վրթանէս քեռին ձին ծառին կապեց, իսկ Ստեփանն առանց սպասելու շտապով իջաւ սայլից և վազեց խրճիթը: Պարոյրն անշարժ պառկած էր կիսաբաց աչքերով. կողքին դրած թէյն ու հացին բոլորովին ձեռք չէր տուել: Ստեփանը բարձրաձայն հեկեկալով դուրս վազեց խրճիթից:

—Քեռի ջան, տես, նա մեռնում է, աղաղակում էր Ստեփանը: Խեղճը յոգնածութիւնից և քաղցից իրան կորցրել էր. երեսը դռանը դէմ տուած՝ աղիոյորմ լաց էր լինում: Այդ ժամանակ Վրթանէսը ներս

մտաւ խրճիթը, մօտեցաւ հիւանդին, ձեռքը բռնեց և ճակատը շօշափեց: Պարոյրը կրակի պէս այրւում էր և տնքում:

— Է՛, Ստեփան լռիր, ինչ ես գոռում. գնա՛ մի դոյլ սառը ջուր բեր, դէ՛ շո՛ւտ արա: Տաքութիւնը սաստիկ է, ինքը թոյլ երեխայ է երևում խեղճը: Աստուած ոչ անի, բայց եթէ մեռնի այստեղ, ինչ դժբախտութիւն կըլինի, ինքն իրան ասում էր Վըրթանէսը:

Ստեփանն շտապով կատարեց քեռու հրամանը: Երբ ջուրը բերեց, Վըրթանէսը երեսրբիչը թաց արեց, քամեց և դրեց հիւանդի ճակատին. յետոյ սայլակի մէջ խոտից փափուկ անկողին պատրաստեց և Պարոյրին տարաւ մէջը պառկեցրեց. Սպեփանին էլ հրամայեց մի դոյլ ջուր վերցնել, նստել Պարոյրի կողքին և շուտ-շուտ հիւանդի գլուխը թըջել. իսկ ինքը բռնեց ձիու սանձը և զգուշութեամբ անտառից դուրս եկաւ:

— Քեռի, ուղղակի աղայենց մօտ գնանք, նրանք կըրժշկեն սրան:

— Դու ինձ մի սովորեցնի, ինքս էլ լաւ գիտեմ, թէ ինչ պէտք է անեմ:

Ստեփանը հանգստացաւ և սկսեց շուտ-շուտ թըջել Պարոյրի գլխի շորը:

Երբ աղայի տունը հասան՝ Ստեփանը մնաց Պարոյրի մօտ, իսկ Վըրթանէսը ներս գնաց և բոլորը մանրամասն պատմեց: Միքանի բոպէից յետոյ դուրս

եկան տիկին Սըբուհին և իւր աղախինները, մօտեցան սայլակին, որ Պարոյրին տեսնեն:

— Աստուած իմ, այս ինչ զրութեան մէջ է խեղճ երեխան. ուշքը վրան չէ. ինչպէս նիհար է, ձեռքերը կատարեալ չօփի նման են: Ստեփան, այդ դ՞ու ես. սրտեղ ես գտել այս փոքրիկին. սակայն այդ պատմութիւնը յետոյ. դու երևի քաղցած ես, գնա՛ խոհանոց, մի բան կեր և հանգստացիր: Վըրթանէս, դու գնա՛ իսկոյն հիւանդանոց և մի բժիշկ բեր, հիւանդութիւնն էլ մանրամասն պատմիր բժշկին, որպէսզի հարկաւոր դեղերը հետը բերէ:

Պարոյրին սայլակից զգուշութեամբ վերցրին և ներս տարան մի հով, յարմար սենեակ, վրայի շորերը փոխեցին և մաքուր ու փափուկ անկողնում պառկեցրին. գլխին սառուց դրին, ոտներին էլ մանանեխ կպցրին:

Ջուտով ծերունի բժիշկը եկաւ, քննեց Պարոյրին և յայտնեց, որ երեխայի զրութիւնը շատ վտանգաւոր է:

Տիկին Սըբուհին հարազատ մօր նման խնամում էր հիւանդին:

Երբ Ստեփանը կշտացաւ ու մաքրուեց՝ տիկին Սըբուհին կանչեց նրան և սկսեց հարց ու փորձ անել Պարոյրի մասին: Եւ Ստեփանը մի առ մի պատմեց ինչ որ գիտէր:

— Դու ասում ես, որ Պարոյրի ծնողները քաղաքի մեծ փողոցումն են ապրում, բայց ինչպէս է նրանց ազգը:

—Այդ մասին ես Պարոյրին բոլորովին չեմ հարցրել:

—Երեակայում եմ սրա ծնողների դրութիւնը. խեղճերը ինչպէս շփոթուած կըլինեն. երեւի ոստիկանութեանն էլ յայտնել են իրանց որդու կորուստը: Ազան ինքը այսօր քաղաք է գնալու. երեւի կըկարողանայ գտնել Պարոյրի ծնողներին: Բայց դու ինչո՞ւ էիր քաղաք գնացել:

—Ես ուզում էի ինձ համար մի տեղ գտնել ծառայելու:

—Ապա ինչու չեկար ինձ մօտ կամ աղայի մօտ. մենք քեզ կօգնէինք, ասաց տիկին Սրբուհին:

—Ես չէի համարձակուում ձեզ դիմել:

—Այժմ ինչ ես մտադիր անելու:

—Չգիտեմ. Պարոյրը խոստացաւ խնդրել իւր հօրը, որ ինձ վարձէ. ես էլ սաստիկ սիրեցի այս փոքրիկին, շատ եմ ցաւում դրա համար: Թոյլ տուէք խնդրեմ, տիկին մի ներս գնամ նրան տեսնեմ:

—Նա դեռ այնքան լաւ չէ. երբ ուշքը վրան գայ, դու պէտք է անպատճառ մօտը լինես, ապա թէ ոչ նա մեզանից ոչ մէկին չէ ճանաչում: Խեղճը շարունակ զառանցում է և կարծում է, թէ իւր մայրն էմ:

—Ա՛խ Առտուած, երանի թէ մի շուտ լաւանայ:

—Վըթանէս անտառապահը խնդրում է, որ քեզ իրան օգնական նշանակենք, ասաց տիկինը. ուզո՞ւմ ես դու այդ պաշտօնը:

—Չատ շնորհակալ կըլինեմ ձեզանից տիկին, ասաց Ստեփանը:

—Ես լսել եմ, որ դու գրել կարգալ էլ գիտես. անա քեզ գիրք. գնա՛ առայժմ խոհանոց, նստիր կարգա՛. երբ հարկաւոր լինես, կըկանչենք:

Ստեփանը ուրախութեամբ վերցրեց գիրքը և դուրս գնաց, իսկ տիկին Սրբուհին մտաւ առանձնասենեակը, որպէսզի բոլոր լսածները պատմէ ամուսնուն և ապա նրա համար ճանապարհի իրերը պատրաստէ: Պարոն Աբգարը շտապով ճաշեց ու հրամայեց կառքը լծել. ապա տիկին Սրբուհուն ու երեխաներին մնաք բարեւասելուց յետոյ, ճանապարհ ընկաւ դէպի քաղաք:





ԺԲ

ՊԱՐՈՅՐԻ ԾՆՈՂՆԵՐԻ ԴՐՈՒԹԻՒՆԸ

Պարոյրի կորչելու օրը դայեակը տունն վերագառնալիս՝ մտաւ քաղցրեղէնի խանութը՝ խոստացած կարկանդակները գնելու և ապա շտապով քայլերն ուղղեց դէպի տունն, որ շուտով իւր սիրելի Պարոյրին կերակրէ, կարկանդակներով թէյ խմեցնէ և ասլա հետը խաղայ և ուրախացնէ:

Դայեակը մտաւ տունն, գլխի շալը յետ արաւ և կամաց մտաւ մանկանոցը, որ տեսնէ ինչով է զբաղուած Պարոյրը: Բայց Պարոյրն այնտեղ չկար: Դայակը մտաւ սեղանատունն ու սկսեց սեղանը պատրաստել Պարոյրի համար, և կարծելով թէ նա թագ է կացել՝ սկսեց կանչել և փնտուել նրան: Ննջարանում տեսաւ Պարոյրի տանու շորերը թափթափած, իսկ նորերը այլևս այնտեղ չէին:

—Այ դու չարճճի, ասաց դայեակը, դուգուել ես ու թագ կացել: Պարոյր, ո՞ր ես. դէ՛ ձայն հանիր սիրելիս. ես արդէն յոգնեցի քեզ փնտուելով, դձուրս եկ, ճաշելու ժամանակ է: Քեզ համար կարկանդակ-

ներ եմ բերել, տես ես կուտեմ. ինչու ես շորերդ կեղտոտում, դձուրս եկ, ո՞ր ես:

Այսպէս կանչելով՝ դայեակը բոլոր կահկարասիքի տակերն ու անկիւնները դիտեց, նայեց:

—Մարիամ, ասաց դայեակը խոհարարուհուն, չգիտես արդեօք Պարոյրն ո՞ր է:

—Ես սենեակները չեմ մտել, չգիտեմ:

—Տէր ողորմեա, այս ինչ պատիժ է. չլինի թէ դուրս է գնացել փողոց, շփոթուում էր դայեակը:

Երբ նկատեց, որ Պարոյրի գլխարկն ու ձեռնափայտն էլ չկան՝ շտապով ներքև վազեց, որ դռնապանի կնոջը հարցնէ. բայց նա էլ չէր տեսել Պարոյրին: Դայեակը գլուխը կորցրած այս ու այն կողմն ընկաւ—էլ փողոց, էլ հարևան շմաց, ամեն տեղ փնտուեց ու հարցրեց:

Երբ դռնապանը տունն եկաւ և իմացաւ պատահած անբախտութիւնը՝ իսկոյն գնաց Պարոյրի կնքահօր տունը, ուր հիւր էին գնացել Հայկազեանները: Հէնց նոյն ըոպէին Պարոյրի հայրը կնոջն ու աղջկան թողնելով այնտեղ, ինքը պատրաստուում էր տուն գալու, որպէսզի Պարոյրին առնէ, տանէ կնքահօր մօտ, եթէ միայն նա ներողութիւն կըխնդրէ իւր կամակորութեան համար:

Պարոն Հայկազեանը երբ մօտեցաւ իրանց տանը՝ նկատեց որ այնտեղ մի իրարանցում կայ. բոլոր ծառաները, դռնապանները, հարևանները և անցորդները հաւաքուել են, ասում-խօսում են:

Երբ դայեակը պարոնին տեսաւ, արտասուքնե-

ըից ուռած աչքերով ընկաւ նրա առաջ և աղաղակեց.

— Աղա ջան, ոչ մի տեղ չեմ գտնում նրան, տանից փախել է, չգիտեմ որտեղ փնտռեմ:

— Ի՞նչ է պատահել, ո՞վ է փախել, հարցրեց պարոն Հայկազեանը:

— Պարոյրը չկայ, վայ գլխիս. եթէ նա կնքահօր մօտ չէ, էլ կասկած չկայ, որ երեխին գողացել են: Ի՞նչ անեմ հիմա, գլուխս ո՞ր քարին տամ:

— Գժուել ես ի՞նչ է. ի՞նչ ես ասում, նազու, երեքի նա թաղ է կացել, որ քեզ վախեցնէ:

— Տեղ չմնաց, աղա ջան, ամեն ծակ ու ծուկը ման եկայ, փնտռեցի, բայց չգտայ: Չփոթուած հայրը շտապ-շտապ բարձրացաւ սանդուխքով և տեսաւ, որ սենեակները խառնած են, բոլոր կահկարասիքը տեղահան արած: Այդ ժամանակ նա համոզուեց, որ տանը երեխին շատ են փնտռել, բայց չեն գտել:

Մինչդեռ պարոն Հայկազեանը ծառաներին այս ու այն կողմն էր ուղարկում փնտռելու և ինքն էլ ուզում էր ոստիկանատուն գնալ, եկաւ Պարոյրի մայրը, քոյրը և նրանց յետեից կնքահայրը:

Կարող էք երեւակայել, թէ ինչ իրարանցում ընկաւ ամբողջ տան մէջ և ինչ անհանգիստ զիշեր անց կացրին ծնողներն ու բոլոր տանեցիք, երբ տեսան, որ Պարոյրին ոչ մի տեղ չեն կարողանում գտնել:

Երկու օրից յետոյ Հայկազեանները իմացան, որ Պարոյրը եղել է այգումը, երեխաների հետ ձի-ձի է խաղացել, կեռաս է գնել ու կերել, յետոյ տեսել են,

որ Պարոյրի հետ մի գիւղացի տղայ էլ է եղել. բայց թէ յետոյ ուր են գնացել կամ ի՞նչ են եղել, այդ ոչոք չգիտէր:

Պարոյրի խեղճ մայրը վշտից հիւանդացաւ. դա յեակն ու Հեղինէն անդադար լաց էին լինում: Պարոն Հայկազեանը տխուր-տրտում այս ու այն կողմ ընկնելով որոնում էր իւր որդուն:

Այսպէս անցան եօթ երկար ծանր օրեր: Երբ պարոն Աբգարը քաղաք եկաւ, գնաց ոստիկանատուն և իմացաւ, որ իսկապէս Հայկազեանների եօթը տարեկան երեխան կորել է, իսկոյն վերցրեց նրանց հասցէն և կառքը քշել տուեց դէպի նրանց տունը:

Գժուար է նկարագրել Հայկազեանների ուրախութիւնն ու շփոթութիւնը, երբ պարոն Աբգարը յայտնեց, թէ Պարոյրը գտնուած է, միայն հիւանդ է:

Պարոյրի ծնողները վճռեցին իսկոյն պարոն Աբգարի հետ նրա կալուածքը գնալ:

— Խնդրում եմ, մի վրդովուէք և մի տխրէք. Աստուած ողորմած է, ձեր երեխան շուտով կառողջանայ: Հաւատացնում եմ, ինչ կարող էինք, ամեն բան արինք ձեր երեխայի համար. արդէն բժիշկը եկաւ տեսաւ հիւանդին. կինս էլ առանց հեռանալու նստած է երեխայի մօտ և խնամում է: Մեր տունը բաւական մեծ է և շատ ուրախ կըլինենք, եթէ դուք բոլորդ գաք մեզ մօտ մինչև Պարոյրը առողջանայ, որովհետև այժմ նրան տեղափոխելը վտանգաւոր է: Իսկ ձեր փոքրիկ օրիորդի համար էլ երկու ընկերու-

հիններ կան մեր տանը, որոնք շատ կուրախանան այդպիսի փոքրիկ հիւրի գալուն:

—Ի՞նչ կերպ յայտնեմ ձեզ իմ շնորհակալութիւնը, բարեսիրտ պարոն, արցունքն աչքերին ասում էր պարոն Հայկազեանը: Միրելի Աշխէն, ասաց նա կնոջը, հրամայիր բոլոր հարկաւոր շորերը դարսեն քեզ և Հեղինիկի համար. դուք մինչև Պարոյրի լաւանալը կըմնաք պարոն Աբգարի տանը:

Մի ժամից յետոյ պարոն Աբգարը և Հայկազեանները կառքով ճանապարհ ընկան: Երբ կառքը հասաւ կալուածքին, տիկին Սրբուհին դուրս եկաւ հիւրերին ընդունելու: Քնքշութեամբ փաթաթուեց նա տիկին Աշխէնին և ամեն կերպ աշխատում էր քաջալերել նրան: Նրա գեղեցիկ ալջիկները՝ տասը տարեկան նունէն և տասերկու տարեկան Մանէն սիրով ընդունեցին Հեղինէին. տարան իրանց սենեակը և մի քանի ըոպէից բոլորովին բարեկամացան:

Պարոն Աբգարը և պարոն Հայկազեանը գնացին Պարոյրի սենեակը. այդ ժամանակ բժիշկը դուրս գալով՝ պատահեց նրանց և ասաց, որ երեխան հանգստացել ու քնել է և յոյս կայ որ լաւանայ:

—Երբ այս քնից յետոյ երեխան ուշքի գայ, ասում էր բժիշկը, լաւ կըլինի, որ նրա մօտ լինի այն գիւղացի տղան, որի հետ նրան այստեղ էք բերել. թող նա զգուշութեամբ յայտնէ հիւանդին, որ ծնողները եկել են:

Այսպիսով որոշուեց հիւանդին տեսնելը յետաձգել մինչև միւս առաւօտը: Խեղճ ծնողները դուրս

ճեղքից միայն կարողանում էին նայել իրանց սիրելի որդուն:

Ստեփանը մաքուր շորեր հագած, լուացուած ու սանրուած երբ ներս եկաւ, Հայկազեանները շատ հաւանեցին նրան, սկսեցին մանրամասն հարց ու փորձանել Պարոյրի գլխին եկած արկածների մասին:

Ստեփանը պատմութիւնը վերջացրեց և ապա հանդարտ քայլերով, գիրքը ձեռին՝ գնաց նստեց հիւանդի մօտ, որ ճշտութեամբ կատարէ իրան յանձնած հիւանդապահի պաշտօնը:



ԺԳ

ՊԱՐՈՅՐԻ ՏԵՍԱԿՅՈՒԹԻՒՆԸ ԾԵՈՂՆԵՐԻ ՀԵՏ

Միւս առաւօտ, երբ Պարոյրը զարթեց և տեսաւ Ստեփանին՝ ճանաչեց և չափից դուրս ուրախացաւ, մինչև անգամ նկատեց նրա նոր շորերը:

Ստեփանը կաթ խմեցրեց նրան և ապա սկսեց կամաց-կամաց իրանց գլխով անցածները պատմել. թէ ինչպէս Վրթանէս քեռին նրան զիւղ բերեց, ինչպէս նրան այս սենեակը բերին և պառկեցրին, ինչպէս ծնողներին իմաց տուին և թէ նրանք էլ երէկ երեկոյեան եկել են և սաստիկ փափագում են իրան տեսնել: Պարոյրը սկզբում լսում էր, կարծելով թէ մի հեքիաթ են պատմում. բայց վերջը գլխի ընկաւ և շփոթուած ասաց.

—Ստեփան, դու այդ բոլորը ուղիղ ես ասում:

—Բոլորն ուղիղ եմ ասում, սիրելիս, միթէ դու ոչինչ չես յիշում:

—Ստեփան, ճիշտ ես ասում, որ հայրիկս ու մայրիկս եկել են: Նրանք ինձ վրայ բարկացած չե՞ն արդեօք:

—Ինչ բարկանալու ժամանակ է. նրանք անչափ ուրախ են, որ քեզ գտել են:

—Ստեփան, սիրելիս, կանչիր շուտ նրանց ինձ մօտ:

—Այո, իմ աչքի լոյս, մենք այստեղ ենք, ասաց մայրը ներս մտնելով. խեղճ դաւակս, միայն դու շուտ առողջացիր:

Տիկին Աշխէնը մօտեցաւ հիւանդ որդուն և սկսեց համբուրել նրա նիհարած ձեռքերը:

—Իսկ հայրիկը, արդեօք նա չէ բարկանում, նա ինձ կընե՞րէ. փաթաթուելով մօրը ասում էր Պարոյրը, ես այլևս երբէք կամակորուժիւն չեմ անի, մայրիկ ջան:

—Իհարկէ կընե՞րեմ, իմ անխելք փոքրիկս, ուրախադէմ ասաց հայրը, որ Պարոյրի մահճակալի մօտ կանգնած՝ վաղուց նայում էր իւր փոքրիկ կամակորին:

—Հայրիկ ջան, ինչպէս ուրախ եմ հիմա. ես ձեզ շատ եմ սիրում:

—Գէ այժմ բաւական է, հանգիստ պառկիր. շատ խօսել չէ կարելի, ասաց բժիշկը ներս մտնելով. երբ կառողջանաս՝ դու ինձ «կապիկն ու ակնոցը» բերանացի կասես. ես վաղուց մոռացել եմ, իսկ դու ասում են, շատ լաւ ես իմանում:

Պարոյրը ժպտաց, համբուրեց մօր ձեռքը, փաթաթուեց հօրը և գոհ հայեացքով դարձաւ Ստեփանին.

—Տեսնո՞ւմ ես Ստեփան, ինչ բարի հայրիկ և մայրիկ ունեմ: Կանչեցէք Նազուլին, Հեղինիկին և վարժուհուն, ես ուզում եմ նրանց տեսնել:

—Ո՛չ Պարոյր ջան, ծիծաղելով ասաց մայրը, դու այժմ հանդիստ պառկիր և եթէ կարող ես. քնիր, Հեղինէն յետոյ կը գայ քեզ մօտ. իսկ նազուռն և վարժուհին քաղաքում մնացին:

—Հայրիկ ջան, քեզ մի գաղտնիք ունեմ ասելու և մի լուրջ խնդիր, ասաց Պարոյրը:

—Յետոյ, յետոյ զաւակս, աւելի լաւ է այժմ քիչ քնիր: Գուրս գնանք այստեղից Աշխէն: Թող Պարոյրը քնի: Եւ ամենքը բացի Ստեփանից դուրս եկան սենեակից:

Այդ օրից Պարոյրն սկսեց լաւանալ: Վերջապէս Պարոյրը իւր գաղտնիքն ու լուրջ խնդիրը յայտնեց հօրը. նա խնդրեց, որ Ստեփանին իրանց մօտ պահեն: Հայրիկը ուրախութեամբ կատարեց իւր որդու խնդիրը: Յետոյ երբ պարոն Հայկազեանը նկատեց Ստեփանի բարեսրտութիւնը, սրամտութիւնը և ընդունակութիւնը՝ վճռեց նրան ուսումնարան տալ:

Վրթանէս քեռուն պարոն Հայկազեանը մի լաւ հրացան ընծայեց, իսկ Պարոյրը Ստեփանի խորհրդով, իւր մի ըուբլով նրա համար մի գրուանքայ ծխախոտ գնեց:

Պարոյրը իւր հիւանդութիւնից յետոյ «Կապիկն ու ալնոցը» առակը շատ լաւ սովորեց և երբ վարժուհու մօտ ասաց. նա ուրախացաւ և համբուրեց Պարոյրին: Աշնանը կնքահայրը մի լաւ մանկական խնճոյք սարքեց: Այդ օրը Պարոյրը, Ստեփանը, Հեղինէն, Նունէն և Մանէն չափից դուրս ուրախ անց

կացրին: Կենդանի պատկերներ էին սարքում Պարոյրի արկածներից և ծիծաղում ու ուրախանում:

Պարոյրը երբ մեծացաւ և ուսումը աւարտեց, շատ լաւ և խելօք մարդ դարձաւ: Ստեփանն էլ մեծացաւ, բժշկութիւն սովորեց և յայտնի մանկական բժիշկ դարձաւ:

Ստեփանին Հայկազեանները շատ էին սիրում և այդպէս սիրով էլ մնացին մինչև վերջը:

Չատ-չատ անգամ յիշում էին նրանք իրանց անտառում մոլորուելու պատմութիւնը և զուարճանում էին:



16 20

գրքի է 15 4.

Վաճառում է քննարոնական, Կովկասեան եւ Գո
աներէրդ գլխավաճառանոցներում .